


DISUNGULA DYÀ

MUKAJÌ WA KUSÈLA

 Babeedi bààbùngì be. Ncyèna ne mushindu wa kufika kudibo bônso musangu umwe to. Kadi, teejeaayi.

² Ncyà bushuwa ne ndi ne disanka dya kwikala cyakabidi mwaba ewu, diloolo edi, mu nzubu wa dibalaasa mulenga ewu, munkaci mwa kasumbu kalenga kaa bantu aka. Nenku tuvwa twenda tulwa, pambelu pààpa, kwènji katanci, bantu biimanyine pambelu mu mùsèèsù bamba ne kabavwa ne mushindu wa kubwela to. Ki mèmè kwamba ne: “Ee, pàmwàpa ndi mwa kunupetela kaaba.” Kadi kabayi baswe kubapicisha bwa kupwekabo to. Pa nanku bidi bintacisha mutudi katuyi mwa kwikala ne mwaba mukumbane bwabo bôbò. Bavwa bamba ne nzubu wa mwinshi mwa buloba uvwa pende mùle. Pa nanku bidi bitutacisha be bwa bwalu abu. Kadi tudi ne disanka dya kwikala kaaba aka, kabidi ne disanka dya kumona kasumbu kîmpè kaa bambi aka, beena kantu-ku-byanza aba, ne nwènù bônso tusumbu twa baaminnyampala tûdi tufumine ku bitupa bishiileshiilangane bya ditunga.

³ Mwawa mupete dyèsè dinene dya kwakula mu dinda emu ku didya dya dinda, cîntù bushuwa munange bu buneeme bumpa bwa kwakulaku kumpala kwa bantu bîmpè baa mushindu wawa. Mwawa mwikale ngakula pa cyena bwalu cya ne: *Cizubu Kacyàkupyàna Pàmwè Nè Blé To*. Neivwa mufike ku dicijikija to. Kadi kacivwa ci—cilema cya mwaneetu awu to. Yèyè uvwa muteete bwa kwambila mulongolodi wa ndongamu bwa kutulekela twètù kushaalaku ndambu, kadi awu kayiku mwa kuswa bwa kucyenza to. Cya bushuwa ne mèmè ndi mwanyishe ciine aci, Mwaneetu Demos. Aci ncîmpè be, cîmpè menemene. Cya bushuwa ne ndi nnewela twasakidila bwa musangeelu wenu, muntu ne muntu. Kadi bôbò mbavwa anu kabayi baswe kutulekela tucyenza to. Ki pa nanku twètù kwenzejiibwa anu bwa—kwenzejiibwa anu bwa kwimanyika’s. Nèngàngatè cyôci aci, mûngà musangu, bwa kucijikija: *Cizubu Kacyàkupyàna Pàmwè Nè Blé To*. Nuvwa bacyûmwè anyi, nwènù bavwa kaaba aka? [Disangisha didi dyamba ne: “Amen.”—Muf.] Ndi ntekemena ne kuvwa bintu bûngì bukumbane bwa ne civwa cifwanyine kwikala cyumvwiike.

⁴ Mpindyewu, ndi mumanye, diloolo edi ne, kudi kabidi muyiiki wa ku télévion, pa nanku ncyèna muswe kunulama apa ntanta mutambe bule to bya bifwanyine nwènù kuwupangila. Bwalu, ndi bulelela ngeela meeji ne civwa cintu cya mushinga

bwa—bwa beena kwitabuuja baa beena Mpenta, muyiiki wa ku télévision utuvwa babandile diloolo adi awu. Musumbà mulenga wa bantu baa mushindu wawa, mandamuna malenga a mushindu wawa, a buludi. Civwa cyenze ne mèmè ndyũmwè bimpè be, pa kumona cyôci aci. Ndi mutwishiiibwe ne Mukalenge neawubeneshe, diloolo edi. Nenku ewu yõnsò wâbandila awu, itabuujuke. Ki cidi cifwanyine kwikala dyanyi disambila dya meeji matooke.

⁵ Ne milubu yâbũngì yidi milwe, leelu ewu, ku poste ne ku mabiikila a ku telefone, a bantu bââbũngì be badi bondopiibwe mu disangisha edi. Mvwa ne disanka be bwa cyôci aci. Aci, cidi ne, pa kumona bantu ne mabeedi, aci's ki wanyi mudimu wa bwambi mu mushindu kampanda.

⁶ Ntu—ntu mbànda apa bwa kuyiisha. Mèmè, nudi bamanye's, nciitu muyiishi to. Kadi mèmè, ne cyôci eci, wanyi mwakulu wa cyena Kentucky wa ne, “his, haint” ne—ne myaku yõnsò ayi, pa nanku ncyèna—ncyèna mwa kwamba bu citudi tubiikila ne mmuyiishi wa cyena leelu wa leelu ewu awu to. Ncyênàku—ncyênàku mufwanyine kwangata kaaba aku to, bwalu ncyèna—ncyèna ne kalaasa kândi mulonge to.

⁷ Kadi bulelela ntu muswe kwamba patooke cîndì mumanye pa Cyôci aci, ngambilangana, anyi cîndì ngumvwa ne ki cîndì mumanye pa Cyôci aci, ncyambilangana, mushindu wûndì muCiyiile, mushindu udiYe kûndì. Yèyè ki wanyi mwoyi wõnsò, cyõnsò cîndiku mufwanyine kutekemeni bwa kwikala, ne bipite ne mûnkaadiku mwelele meeji, bwa ne ncivwaku mufwanyine kwikala ne mulunda to, bikole be, pa buloba, pâncìvwà mwânà mutekete. Kadi ndi bulelela ne kusakidila bwa balunda banene leelu ewu.

⁸ Ndi...[Mwaneetu wa balume kampanda udi wamba ne: “Kudi ndambu wa lutatu bwa kuumvwila paanyima pàâpa, Mwaneetu Branham. Seemenaku lwà pabwîpî menemene.”—Muf.] Kaa, numfwileku luse. Ndi—ndi bu udi nciyi mwakaje ndudi kaaba aka, mwaba kampanda, mwâmbiye.

⁹ Mpindyewu, bwa kubwela buludi mu diyiisha, tubuululaayi bwa dibala dya ndambu wa Mifundu. Ntu—ntu misangu yõnsò munange kubala Bible, bwalu Yèyè ki Dìyì dya Nzambi. Ki cîndì ngiitabuuja. Ne ntu ngiitabuuja ne Yèyè ki Dìyì dya Nzambi didi kadiyi mwa kupangilaku to. Nenku mpindyewu ndi ne ndambu wa Mifundu mifunda kaaba aka, ne tuntu ndambu tûndì mufunde tûndì muswe kwikala nteela, munda mwa tusunsa ndambu, pâmwăpa munda mwa tusunsa makumi anaayi ne tutaanu.

¹⁰ Ne pashiishe netupatuke pa dîbà bwa kuya kabandila cyakabidi muyiiki mulenga wa ku télévision ewu diloolo edi. Ne ndi mutwishiiibwe ne Nzambi neatungunuke ne kunubenesha too ne kundekeelu. Ne ndi mumanye cidi cikengela bwa nwènu

kwenza. Kadi mêmè ndi ne cya kwendesha mashinyi too ne ku Tucson, nansha nanku, diloolo edi, nwamonu's, pa nanku nudi mwa kudifwanyikijila. Nntanta wa mêtà dikumi mu mashinyi.

¹¹ Nenukù nêngùumukè nye dyamwamwa dya mbû, ne bidi bikengela ntwibwe cisâlù cya mubidi kapywa wa kalaabi bwa diteeta mu dinda ku mbulamataadi. Nenukù bikengela bwa mêmè—mêmè kafika kuntwaku. Bavwa bantentemwine dituku, dituku adi, nenukù kabaakunngiitabila bwa ngâmbè cyakabidi ne “to” bwa mpindyewu nansha. Ne ndi ne cikwabo cisâlù cya kwangata bwa tétanos ne typhus, ne bisâlù bikwabo bya disakidila.

¹² Pa nanku, ndi ne kusakidila kwa manza tente bwa mpunga ewu, ne—ne bwa disangisha dilenga ditudi benze kumpala kwa cibilu edi. Ncya bushuwa ne mbitupishe mwoyi wanyi ne disanka. Nudi musumbà wa bantu mulenga be. Ndi mutwishiiibwe ne Nzambi neanubeneshe.

¹³ Pavwa dîbà dinene adi dya...Cinyama cinene cya cilengulengu cidi cilaale kuntu kwaka aci, civwa cikuvumuke mu Alaska mwamwa aci, kukaadi ndambu wa matuku, ncikùpe cyakabidi mukila waci muulu mu dinda emu, lwà kwàka, mu nyungulukilu wa mu Washington. Ncifwanyine kwasa lwendu citangile lwà kuneeku, anu bipeepele menemene. Kadi bu Nyuma Mwîmpè mungambile mushindu udibi menemene . . .

¹⁴ Muntu mukwabo uvwa wandamuna...unkonka ne: “Necyenzekele muneemu emu anyi, Mwaneetu Branham?” To, ncyèna mumanye aci to. Ncyèna anu mumanye to, anu pângâamanyà bushuwa. Aci mbulelela.

¹⁵ Ntu misangu yônsò muswe kwikala ne meeji matooke kunudi. Ncyakudicinkilaku to, kwangata mmwenenu yônsò naka, anyi cikampanda, cîndî mêmè ngiitabuuja, anyi cintu kampanda cya nanku awu. Pângâànwâmbilâ, necyenzeke. Ee, nebikengele Yèyè ànjî angambile, dyambedi, nenukù pa dîbà adi mêmè nênnwâmbilè. Ndi—ndi mumanye ne buloba bujima budu mu ngiikadilu wa luzakalu. Tukaadi ku cikondo cya nshiikidilu. Kadi cintu cimwepele cîntù mêmè muteeteteete bwa kwikala . . .

¹⁶ Mwaneetu Shakarian uvwa wamba mu dinda emu, muvwaye ne ciibidilu cya kupicila mu milongo ya babeedi, wololamu cyanza wangata twarta twa masambila atu kumpala kwa bantu kulwabo kuneeku, utangilapu, umona ní—ní mwva mbambila bivwabo bafundepu abi. Bôbò batu bafunda bintu bya mishindu yônsò naka pa twarta twabo twa masambila atu, nudi bamanye's, kadi yèyè uvwa ukeba anu bwa kumona ne ncya bushuwa anyi. Mmwambe ne, pa nkama yidiye mukenkete ayi, kakuvwaku cya mafi nansha cimwe to. [Mwaneetu Shakarian udi wamba ne: “Kacya cya mafi nansha cimwe.”—Muf.] Kakwadyakwikalaku cya mafi nansha cimwe to, nwamonu's, bwalu, bu—bu mudibi ne

n’Nzambi. Mêmè mudidinge mudyèlèmu, apu kaayi ncyà mafi anu kuntwadijilu aku.

17 Mwànà mukese wa bakaji mwena tatwëndè udi musòmbe apa ewu, munkaci mwa dinteeleja mpindyewu, uvwa mulwe kûndi, abidi adi panshi aa. Ûvwa mulooto ciloota. Yêyè ne: “Mwaneetu Branham, ciloota eci cidì cyumvwija cinyi?”

18 Mêmè kwamba ne: “Ncyêna mumanye to, mwaneetu wa bakaji. Nebikengele bwa mêmè kujandula, bu Mukalenge mwa kungambila.” Ki mêmè kutungunuka e kuteeta bwa kukonka Mukelenge, kadi Yêyè kaakangambilaku to.

19 Mwànà mukese wa bakaji awu kwalukilaye cyakabidi. Yêyè ne: “Ee, mpindyewu dyumvwija dya ciloota cyanyi dyèpi?”

20 Mêmè ne: “Vwila apa, munanga wanyi, sòmbelàbi panshi apa tûng.” Mêmè ne: “Tatwèbè ne mamwèbè mbalunda baanyi baa dikema. Wamonu anyi? Baa bwalu mbenze lwendu lule bafumine ku Canada, buumuke ku mudimu, balwe bwa kwanji kusòmbela naanyi muneemu emu. Badi biitabuuja eci, cîndi nteeta kwamba eci. Ne nciitu mwanji kwambilaku muntu nansha umwe cintu cya mafi nansha cimwe to, ku budiswîlè, kacya bandela. Piikalabi ne ndi. . . Ndi ngeela meeji ne ndi mumanye cidì ciloota aci cyumvwija. Kadi pândi anu nciyi mumone ciloota aci mêmè mwine, ne pashiishe Yêyè ungambila cidici cyumvwija, ncyêna mwa kukwambila to. Wamonu’s, mêmè muteete kukwatakaja cintu kampanda, nkufwanyine kwikala cikondo cyûdi mufwanyine wêwè ewu kwikala naanyi dinjinga pankaci paa mwoyi ne lufu, ne piine apu kuyi mufwanyine kumanya ne bivwa bikengela kungiitabuuja anyi kubenga kungiitabuuja to.”

21 Mêmè munwâmbile cintu kampanda mu Dînà dya Mukalenge, ki cyôci aci bulelela. Awu n’Yêyè udi mungambile aci. Kadi too ne mpindyewu, bidimu byônsò ebi, mu buloba bujima, ne mu nyungulukilu wa buloba, kaCituku cyanji kwikala cya mafi musangu nansha umwe to. Bwalu. . . Nnku, mpindyewu, nudi bamanye ne muntu wetu ewu kêna mwa kwikala kayi mwa kupangila mushindu awu to. Bikengela Nyuma wa Nzambi bwa kwenza aci.

22 Nnku mpindyewu ndi ne Mukenji wûndi mwambwile bujitu. Ne misangu yàbûngi batu bangagate, munkaci mwa bantu, ee, pâmwâpa muntu utu kayiku mwanji kusòmbela panshi bwa kwelaku meeji kasunsa nansha kamwe to, ne ntu—ntu, kaa, muntu mubi be, ne nciituku munange bantu to, ne mêmè mwine ntu mbazèzela anu panshi misangu yônsò. Kadi kabyena nanku to. Kabyena nanku to. Mêmè ntu munange bantu. Kadi, nudi bamanye’s, dinanga ditu dilongolola bilema.

23 Mwaneebe mukese wa balume yêyè mukasòmbe pambelu pààpa mu mùsèèsù, kadi ki wêwè awu ne: “Junior, munanga wanyi, ncyêna muswe wikalè pambelu apu to, kadi. . .” Piine

apu mashinyi paawu munkaci mwa kuvuma mvuumvuum ku luseke lwende, kadi wêwè umwaluja mu nzubu. Yêyè unyeema lubilu walukila cyakabidi pambelu. Mona's, s'bivwa bikengela wêwè kumulongolola. Pawikala mumunange, neumulongolole. Bikengela wêwè kwenza nanku.

²⁴ Wêwè mumone muntu mulèlème wenda upweka ne mâyi a musulu, mutangile ku cisàbàsabà, mu kaabwâtù kakese, peebe mumanye ne kaabwâtù aku nekaye kudiina paafikaku pa cisàbàsabà apu, newâmbè ne: “John, wêwè, pâmwâpa bivwa bikengela wêwè kunanaku lungenyi ndambu, pâmwâpa udi mufwanyine kupanga mwa kupitapu”? Mêmè mumanye ne yêyè kaakupitapu to, s'ndi mufwanyine komunyenguvula ku makanda ne kumukupa pambelu paa bwâtù abu, mêmè ne mushindu, bwalu dinanga ndidi dyanza nanku adi.

²⁵ Nanku mpindyewu, mu Mayiisha ândi nyiisha aa, ncitu nteetaku bwa kwelamu dilongesha kampanda to, anyi ne bikwabo. Ntu—ntu ngenza aci mu ekeleeziya wanyi mêmè sungasunga. Kadi pântù mpatuka apa munkaci mwa balume ne bakaji baa mangumba mashiileshiilangane ne mmwenenu mishiileshiilangane, ntu anu nditacisha bwa kucyangata mu mushindu wa mutekeci, kucyumvwija; kadi bikumbane mu mushindu wa ne wêwè mwikale mulediibwe kudi Nyuma wa Nzambi, ndi ngiitabuuja ne neúmvwè cîndi njinga kwamba aci, munkaci mwa balume beena Kilisto, ba-Méthodistes, ba-Baptistes, ba-Presbytériens, ne bakwabo.

²⁶ Mpindyewu, diloolo edi, ndi muswe kubuulula mu Genese, nshapita wa 24. Ndi muswe kubala . . . kubangila ku mvensa wa 12 wa nshapita wa 24 wa Genese.

Nenku yêyè wakamba ne: Éyi MUKALENGE Nzambi. . . mfumwanyi Abraham, ndi nkulomba ne, ungendesheku dikàsà dîmpè leelu ewu, ne uleejeki bwîmpè kudi mfumwanyi Abraham.

Tangilaaku, nyewu ndi mwimane kaaba aka pabwîpi ne ciinà cya mâyi; ne bânà baa bakaji baa bantu baa mu cimenga nyawu bapatuka bwa kusuna mâyi;

Nenku byenzekeku ne, nsongaakaji ûngâmbilâ ne: Pwekeshaku mulondo, ndi nkulombaku, bwa mêmè kunwa mâyi; ne wâmba ne: Nwaku, nenku nêmpeeshè kabidi tuumeelu twebe mâyi a kunwa awu: yêyè umwèumwè awu ikale ûdi wêwè mufundile musadidi webe Izaka; ne pa nanku mêmè nêmmanyè ne wêwè wândeji bwîmpè kudi . . . kudi mfumwanyi.

²⁷ Ne pashiishe mu Mukanda wa Bwakabuulwibwa. Awu nntwadijilu wa Bible, Genese. Mpindyewu, mu ndekeelu wa Bible, ndi muswe kubala nshapita wa 21 wa Bwakabuulwibwa, ku mvensa wa 9.

28 Tutu bamanye cidi Mufundu wa Genese ewu mwaba ewu . . . Nwábalaayi nshapita mujima awu, panwikala baswe. Nzambi ngudi utuma Eliyeza. Anyi, Abraham ngudi utuma Eliyeza, numfwile luse, bwa kusobwelaye Izaka mukaji wa kusela. Ki Leebeke mulenga kwisù awu kupatukaye, ciikale anu dyandamuna pa dyòdi menemene ku disambila divwa—divwa Eliyèzà, musadidi wa Abraham awu, ufuma ku dyenza.

Mpindyewu ku mvensa wa 9 wa nshapita wa 21 wa Bwakabuulwibwa.

Nenku kulwaku kùndi umwe wa ku banjelo mwandamutekete bavwa ne mpanza mwandamutekete myùle tente ne bipupu bya ndekeelu mwandamutekete abu, ne wakaakula naanyi, wamba ne: Vwila apa, nenku nènkuleejè mukaji musela, mukaji-musela wa Mwânà wa mukooko.

29 Mpindyewu ndi muswe kwangata cyena-bwalu, diloolo edi, bwa cyôci aci ne: *Disungula Dyà Mukàji Wa Kusèla*. Nenku cyôci eci, piikala mwaneetu wa balume udi ukwata mikaba ya mêyi mwab'ewu awu mwa kwanyisha, ewu ki mukaba wùdi mwa kulekela wùpàtuka.

30 Nenku mpindyewu, mu cyôci eci, kî mbwena kwamba menemene ne ndisangisha didi apa edi dîndi ngambila cyôci eci to, kadi mikaba ya mêyi eyi yiyaaya pa buloba bujima. Badi bayikudimuna, pabwîpi ne yônsò, kaa, mu myakulu búngi cyanaana, yikabwela mene too ne mu matunga a bampangaanu mu nyungulukilu wa buloba bujima. Tudi tutuma mikaba ya mêyi ayi, kabiya bya bafuta mfranga to, kudi kasumbu kaa bantu kasunguluke kaa ekeleeziya. Nenku badi bayikudimuna. Ne mwônsò mu bisuku ne mu meetu a mu Afrike, ne mu Inde, ne mu nyungulukilu wa buloba bujima, ki kuyaaya mikaba ya mêyi eyi.

Mpindyewu, disungula dya Mukaji wa kusela!

31 Mu bintu byâbûngi bya mu nsòmbelu tutu bapeebwe disungula. Mushindu wa nsòmbelu, wôwò mwine, ndisungula. Tudi ne bukenji bwa kudipandila njila wetu twètù biine, kusungula mushindu wetu twètù biine wa nsòmbelu utudi baswe kwikala nende.

32 Kulonga kwa kalaasa ndisungula. Tudi mwa kusungula ne netulonge kalaasa, anyi katwakulonga. Aci ndisungula ditudi naadi.

33 Bîmpè ne bibi ndisungula. Mulume yônsò, mukaji yônsò, mwânà wa balume anyi wa bakaji, bikengela asungule ne neikale mwa kuteeta kwikala ne nsòmbelu mwîmpè anyi kubenga kwikala ne nsòmbelu mwîmpè. Ndisungula.

Disungula ncintu cinene.

³⁴ Kwebe kuwaya kwa Cyendeleele ndisungula. Ne pàmwápa, diloolo edi, bamwe baa kunudi nebènzè disungula adi—adi, dya mwaba uwapicishila Cyendeleele, kumpala kwa disangisha edi kujikadi diloolo edi. Nekwikale musangu kampanda, wa ne, pawikala mubenge Nzambi misangu yàbûngi, nekwikale musangu kampanda uwaMubenga bwa musangu wa ndekeelu. Kudi mushoonyi pankaci paa luse ne cilumbulwidi. Nenku ncintu cya njiwu bwa mulume anyi mukaji, mwânà wa balume anyi wa bakaji, bwa kusambuka mushoonyi awu, bwalu kakwena dyalukila to paudi usambuka mukâlù awu. Pa nanku, diloolo edi, ncifwanyine kwikala cikondo cidi bààbûngi mwa kwangata dipangadika dyabo—dyabo, mwaba wikalabo mwa kupicishila Cyendeleele cya kaciyi ndekeelu aci.

³⁵ Kudi disungula dikwabo ditudi naadi mu nsòmbelu, dyôdì adi, ndya mukwebe wa kwikala nende mu nsòmbelu. Nsongaalume anyi nsongaakaji, udi wela cidya bwa kubwela mu mwoyi, mmu—mmupeebwe bukenji bwa kwenzaye disungula. Nsongaalume ngudi usungula. Nsongaakaji yêyè udi ne bukenji bwa kuciitaba anyi kucibenga. Kadi cidi anu ndisungula, nseke yònsò yibidi ayi. Bònsò babidi mulume ne mukaji, badi ne bukenji bwa kwenza disungula.

Kabidi, udi ne disungula, wêwè bu mwena Kilisto.

³⁶ Udi ne disungula dya ekeleeziya, muneemu mu Amerike, too ne leelu ewu, mùdì mwa kwikala uya. Adi ndyebe dyèsè dya sungasunga dya bwena Amerike, dya kusungula ekeleeziya kana yònsò mùdì mwa kwikala. Aci ndisungula. Kwèna mwenzejiibwe bwa kuya nansha ka umwe wa ku yôyì, pawikala kuyi muswe to. Kadi pawikala muswe kushintuluka kuumuka ku wa ba-Méthodistes kuya ku wa ba-Baptistes, anyi kuumuka ku Katolike kuya ku Mishònyì, anyi mikwabo ayi, kakwena muntu nansha umwe udi mwa kukwambila anyi kukwenzeja bwa ulwe ku ekeleeziya kampanda yònsò naka to. Ki bwetu—bwetu budishikaminyi mbwòbù abu. Ki cidi wetu mungalaata ncyòcì aci. Muntu yònsò udi mwa kudisungwila yêyè mwine. Budishikaminyi bwa ntendeleelu, nenku aci's nci—aci's ncintu cinene. Nzambi atukwacisheku bwa twètù kutungunuka ne kucilaminyina tootooto ne mwetu mwònsò.

³⁷ Udi kabidi ne disungula. Anyi ne . . . Paudi usungula mwine ekeleeziya ewu, udi mwa kusungula anyi wêwè, mu ekeleeziya ewu, anyi ne wásungula ekeleeziya wíkala mwa kukulombola too ne kwebe kuwaya kwa Cyendeleele. Udi mwa kusungula ekeleeziya udi ne twitabaayi kampanda, bya wêwè mufwanyine kwela meeji ne twitabaayi awu ki ciine cyùdì menemene ukeba. Anyi, ekeleeziya mukwabo awu udi ne wende twitabaayi.

³⁸ Ne pashiishe kudi Dìyì dya Nzambi, dyùdì ne disungula dya kwenza. Bikengela wènzè disungula.

Kudi mukenji udi kawuyi mufunda to munkaci mwetu, wa disungula.

³⁹ Ngeela meeji ne ùwva ng’Eliya, musangu kampanda, pa Mukuna wa Kaamèèlè, paanyima paa diteetangana dya makanda, mu dîbà dya bwalu bukole dya cibwejàkàjì bu mutukaadi twamba kufikamu mpindyewu mene emu. Ne pàmwàpa, bidi mwa kwikala bwebe wèwè anyi bwanyi mêmè, diloolo edi, butudi twenzela disungula edi, bu mwakadi dilabula dya Mukuna wa Kaamèèlè adi. Bwa kwamba menemene, ndi ngeela meeji ne dikaadi dibangè, mu buloba bujima, patudi twakulangana apa. Kadi nekulwe kataataka cikondo cyakengelabi bwa wèwè kwenza disungula.

⁴⁰ Neku nwènù bantu badi apa aba, beena ekeleeziya yenu ya cyena mangumba ayi, itabuujaayi anu eci ne, dîbà dikaadi pambidi peenu mene, dinwikala ne cya kwenza disungula. Anyi nenubwele mu Nsangilu wa Buloba bujima awu, anyi kanwakwikala kabidi dingumba to. Nebikengele bwa nwènù kwenza cyòci aci, ne diine disungula adi dilwalwa kataataka.

⁴¹ Neku kabidi, ncintu cya njiwu bwa kushaala mwindile too ne pa diine dîbà adi, bwalu udi mufwanyine kupeta cintu kampanda pa wèwè cyùdi mufwanyine kupanga mushindu wa kupatukamu nansha wèwè mudinyukule bishi. Nudi bamanye, kudi cikondo cyùdi mwa kudimwijiibwa, pashiishe, paudi anu usambuka mushoonyi wa didimwija awu, pa dîbà adi ukaadi mutwibwe cimanyinu luseke lukwabo, mutwibwe citampi.

⁴² Vulukaayi ne, pavwa cidimu cya disanka cilwa, ne mwa—mwakwidi mubànde pa kabalu wenda wela mpungi wende apu, ki pavwa mupika yònsò ne mushindu wa kuya mudishikamine. Kadi pavwaye ubenga kwitaba budishikaminyi bwende abu, pa dîbà adi bivwa bikengela kuyabo nende ku ntempelu, ku dikunji, ne bamutubula dici ne mulonda, ne pa dîbà adi ùwva usadila mfumwende awu bwa kashidi. Civwa citwibwa ku dici dyende bu cimfwanyi, cya dyumvwa. “Diitabuuja didi difuma ku dyumvwa.” Yèyè uvva muumvwe mpungi awu, kadi kavwa muswe kumuteeleja to.

⁴³ Neku misangu yàbùngì, balume ne bakaji batu bumvwa Bulelela bwa Nzambi, ne baBumona bushindikiibwe ne bujaadikiibwe, Bulelela, kadi nansha nanku kabayiku baswe kuBuumvwa to. Kudi kabingila kakwabo kampanda. Kudi disungula dikwabo kampanda didibo naadi, pamutu paa bôbò kukungamangana ne Bulelela ne maalu mudiwu, ki bwa cinyi maci abo adi mwa kwikala makanga ku Evanjeeliyo. Bôbò kabaadyakuBuumvwaku kabidi to. Wanyi mubelu kùdi wèwè, padi Nzambi wakula ne mwoyi webe, enza bwalu anu pa diine dîbà adi.

⁴⁴ Eliya wakabapa disungula, divwà dikèngelà bôbò kwenza: “Sungulaayi leelu ewu unwikala mwa kusadila. Piikalabi ne

Nzambi ki Nzambi, Musadilaayi. Kadi piikalabi ne Baala ki Nzambi, musadilaayi.”

⁴⁵ Mpindyewu, bu mutudi tumona ne bintu byònsò bya mu bufuki bidi cimfwanyi cya bintu bya nyuma, bu mutwayiidi mu dileesona dyetu dya mu dinda emu, bu mudi dîbà ne bufuki bwadi. Ki civwa wanyi Bible wa kumpala. Kumpala kwa mêmè kubalaku nansha dibeji dimwe mu Bible, nkaavwa mumanye Nzambi. Bwalu, Bible mmufunda myaba yònsò mu bufuki, ne bwòbù budi bupetangana ne Dîyi dya Nzambi: mushindu udi lufu, dijiikiibwa, dibiika dya ku lufu dya bufuki; ne dîbà dipatuka, dikosolola, dibwela, difwa, dibiika cyakabidi ku lufu. Kudi bintu bûngi cyakaa bitudi bafwanyine kufwanyikija, Nzambi mu bufuki, bitùdi ne cya kushiya ku luseke, bwa Diyiisha edi.

⁴⁶ Mpindyewu, piikalabi ne cya nyuma, anyi, cya mubidi cidi cimfwanyi cya cya nyuma, pa dîbà adi, disungula dya mukaji wa kusela, mu mubidi, ncimfwanyi cya disungula dya Mukaji wa kusela, Mukaji-musela awu, mu nyuma.

⁴⁷ Mpindyewu, ncintu cya kwangata ne disù dikole patuyaaya bwa kasungula mukaji wa nzubu, mulume, bwalu malaya mwaba ewu adi “too ne paatutapulula lufu.” Mushindu awu ki udibi bikengela bwa twètù kulama cyòci aci. Nenku nudi nwenza dilaya adi kumpala kwa Nzambi, ne anu lufu ndwanutapulula. Nenku ndi ngeela meeji ne bivwa bikengela bwa twètù. . . Muntu mwikale ne meeji mu ôwò, mwikale wenza ndongamu bwa matuku acivwavwa, bivwa bikengela kusungulaye mukaji awu ne mbàbì yònsò. Wikale ne mbàbì bwa cyùdi wenza. Ne mukaji pende udi usungula mulume, anyi udi witaba disungula dya mulume, bivwa bikengela kwikalaye ne mbàbì yònsò bwa cidiye wenza aci, ne nangananga mu matuku aa. Bivwa bikengela bwa mulume kwelanganaye meeji ne kusambila kumpala kwa yèyè kusungula mukaji.

⁴⁸ Ndi ngeela meeji ne, leelu ewu, cidi cifikishe mabaka àbûngi ku difwa mpindyewu, bwalu twètù ki bakaadi baleeja buloba bujima dikàsà mu Amerike, mu dishipa dya mabaka. Twètù ki badi baleeja baa pa buloba bakwabo dikàsà. Kudi mabaka afwa muneemu kupita myaba mikwabo yònsò, ditunga edi, diine didi ne cya kwikala, ne badyelela meeji ne, nditunga dya beena Kilisto adi. Bundu kaayi, twètù tubàdi twa dishipa dya mabaka! Ndi ngeela meeji ne, kabingila kaa cyòci aci, mbwalu balume bakaadi baye kule ne Nzambi, ne bakaji bakaadi baye kule ne Nzambi.

⁴⁹ Nenku tudi tusangana, ne, bu mulume mwa kusambila ne mukaji mwa kusambila pa bwalu abu; kabiya anu kutangila mudi mèsù miikale malenga amu to, anyi makaaya manene ne a dikanda awu, anyi bya nanku awu, anyi dinanga kampanda dikwabo dya pa buloba; kadi bivwa bikengela kwanjiye

kutangila kudi Nzambi, kwamba ne: “Nzambi, eci nndongamu Webe anyi?”

⁵⁰ Ndi ngeela meeji ne, leelu ewu, kudi diibila dyàbùngì be, anu bu mu kalaasa. Pàdi—pàdi bânà balwa, mu dinda kampana, bânà bààbùngì ku beena mutumba, balunda baanyi abu—abu, balwa kwanyi bamba ne: “Mwaneetu Branham, udi mwa kutusambidilaku anyi? Netwikale ne di—diteeta leelu ewu. Ndi—ndi mudilongele bufuku bujima, kadi ncyèna mmona ne ndi mwa—mwa kwangula mpasu to. Nsambidilèku.” Ndi ngeela meeji ne mwânà mulongi yònsò ewu, wèwè muswe, bu... Ne baledi ku meesa mu dinda, udi mufwanyineku kwamba ne: “Maman, John nyawu udi ne diteeta leelu ewu. Tumusambidileku mpindyewu.” Ndi ngeela meeji ne aci ncifwanyine kutamba byònsò binudiku mwa kwenza mu mushindu mukwabo kana wònsò abi, anyi ditapa dya dísù pa dibeji dya mukwebe bwa kwibila, ngeela meeji, bu wèwè anu mwa kupatuka ne kusambila bwa bwalu abu.

⁵¹ Nenku bu twètù mwa kulonga citudi twenza patudi tuya bwa kuselangana apu, patudi tusungula mukajeetu, anyi bayeetu, bu twètù nanshà mwa kucilonga mpala ne nyima! Bivwa bikengela bwa mulume kusambilaye mufwileku, bwalu mmufwanyine kunyangakaja nsòmbelu wende yònsò nkòng. Nwavulukaayi ne, dilaya didi ne “too ne paatutapulula lufu,” ne yèyè mmufwanyine kunyangakaja nsòmbelu wende mu kwenza kwa disungula dibi. Kadi yèyè mumanye ne ki mudici amu, kadi wenza disungula dibi ne usela mukaji udi kayi mukumbanyine kwikala mukajende to, cibi ucyenza anu mwine, pa dîbà adi cilema cidid anu ncyende yèyè. Padi mukaji wangata mulume cibi mumanye ne kî mmukumbanyine kwikala bayeebe to, pa dîbà adi cilema aci cidid anu ncyebe wèwè mwine, paanyima paa wèwè mumanye cidid cîmpè ne cidid cibi. Pa nanku, kabivwa bikengela wèwè kucyenza to too ne pawikala musambile musambidilemu.

⁵² Cintu cimwecimwe aci ncidi cyenjiibwa mu disungula dya ekeleeziya. Mpindyewu, udi ne cya kusambila pa bidi bitangila ekeleeziya ûdi nende mu bwobumwe awu. Vulukaayi ne, ekeleeziya yitu yenda myambule nyuma kampana.

⁵³ Mpindyewu, ncyèna muswe kudyulangana to. Kadi ndi mfika ku dyumvwa ne nkaadi muntu mukole, ne nebikengele bwa mêmè kushiyangana ne panwapa, dimwe dya ku matuku adi panshi aa. Ne nebikengele bwa mêmè kulumbulula mu Dituku dya Cilumbulwidi bwa cîndi ngamba diloolo edi eci anyi dikwabo dîbà kana dyònsò. Nenku mêmè, ki bwa cinyi, bidi bikengela ngiikale ne dísù dikole ne mutwishiibwe anu menemene.

⁵⁴ Kadi, udi ubwela mu ekeleeziya kampana, kadi bu wèwè mwa kutangila ngenzeli wa maalu wa ekeleeziya awu, wanji utangila mpaasata kakese, ne pa ciibidilu neuwandule ne

ekeleeziya awu udi wenza maalu bu mpaasata awu. Misangu mikwabo, ntu ngaadikonka ní katùtu anu twangatangana nyuma wa ewu ne wa ewu pamutu paa kwangata Nyuma Mwimpè. Udi ufika mwaba wùdì mpaasata mwikale muumishi wa maalu wa dikema ne wenza maalu a mu mushindu kampanda, neujandule ne disangisha didi dyanza mushindu umweumwe awu. Nènye neebe ku ekeleeziya kampanda kùndì mmona mpaasata wimana, utuma mutu paanyima utuma kumpala. Utangile disangisha adi, badi benza cintu cimwecimwe aci. Udi wangata mpaasata kampanda, mwikale anu usukumina cintu cyònsò naka, pa ciibidilu ekeleeziya neènzè cintu cimwecimwe aci. Pa nanku, mèmè nsungula ekeleeziya, ndi mufwanyine kusungula ekeleeziya mushuwashuwale, wa mushindame, wa Evanjeeliyo mu Kaabujima, wa Bible, bu ne mvwa nsungula wa mèmè kuteekamu famiye wanyi. Sungula. Mvwa mutangile. . .

⁵⁵ Bânà baa balume aba, dituku adi, mwânà wa balume wa Mwaneetu Shakarian ne muku wende, kungangatabo e kuya naanyi mwaba ewu bwa kusambidila nsongaalume mukwabo, kangimba, nsongaalume mwimpè mutambe. Mmufume ku dyalukila. . . Fred Barker, ki dînà dyende ndyôdì adi, ncifùminakù ku lwendu kampanda. Ki bôbò kumbiikila, ne: “Fred uvwa ùpunga ne lufu.” Ki pashiishe, kumpala kwa mèmè kubwela mu nzubu, mukenji mukwabo kulwawu ne: “Mmufwanyine kwikala mufwe mpindyewu mene.” Nenku kwambaye ne ùvwa ne ma—mashi alwa munda mwa bwongo, nenku ùkaavwa mutekete luseke, ne—ne ùkaavwa ùpunga ne lufu, ne mukajende uvwa ujinga bwa mèmè kumusambidila.

⁵⁶ Ki mèmè kudyambidila ne: “Kaa, mèmè muteete bwa kwangata ndeke, mmufwanyine kufwa kumpala kwa mèmè kukufika, ne yèyè udi mwa kwikala mufwe mpindyewu.” Pa nanku, mèmè kubiikila lukasa e kupetangana ne mukaji mutekete awu ku telefone. Nenku—nenku twètù kupetangana ku telefone, too ne ku dici dya Fred. Kavwa mwa kuminaku cintu to. Bavwa bamuminyishila bintu ku kandundu. Kadi patwamusambididi, yèyè kwamba, ùleeja ne cyanza, bwa kumupatulabo kalumyana aku pa muminu. Kupetaye mushindu wa kumina. Bangangabuka kabavwa baciitabuujaku to. Bôbò kukapatula, kadi yèyè kumina. Ùvwa musòmbè bîmpè, dituku adi.

Ekeleeziya; disungula dya ekeleeziya.

⁵⁷ Dibiikila dya ku telefone ndilwe, katanci aka. Mu dinda emu, mwena ekeleeziya wanyi, udi mu bushuwa bwa bwalu mukaji wa ba-Baptistes wa ku Louisville, ùvwa mufwe mu dinda emu pa bwebwebwe. Kadi ekeleeziya wa kwanyi, kasumbu kaa bantu badilambule baa menemene, kudisangabo e kupwekabo, kumpala kwa mulongolodi wa bitalu kumwelaye manga a dibenga kubola, kwimanabo pamwe nende apu, kusambilabo too ne mwavu mwoyi kwalukila munda mwende. Nenku udi ne

mwoyi, diloolo edi. Bakulu baa mu ekeleeziya wanyi, mona's, mbalongeshiibwe bwa kwitabuuja ne bintu byònsò bidi mwa kwenzeka, balwe kudi Nzambi ne meeji matooke.

Pa nanku, udi ne cya kwenza disungula dijaalame.

⁵⁸ Kabidi, mushindu wa mukaji udi muntu mufwanyine kusungula awu, neuleeje twipacila twende ne ngiikadilu wendè. Muntu yèyè musungule mukaji udi kayi yèyè to, cidi cileeja ngiikadilu wa yèyè mulume awu. Ne kudiye ukadiswikila aku, cidi bulelela cileeja cidi munda mwende. Mukaji udi uleeja cidi mu mulume padi mulume ewu umusungula bu ne ki mukajende apu. Cidi cileeja cidi mu kandondo kaa munda mwende. Bidiye wamba bya pambelu nansha biikale binganyi, tangilaayi cidiye musele aci.

⁵⁹ Ndi nya ku birô bya muntu, mwine awu wamba mudiye mwena Kilisto; fôtò ya bakaji butaka milamika ku bimanu mu nyungulukilu mwònsò amu, mujiki wa kale wa boogie-woogie wa bidùndadùnda awu utuuta ntùntùntù. Mèmè ncyèna ncyukaku bidiye wamba to. Ncyèna ngiitabuuju bujaadiki bwende to, bwalu wende nyuma udi udiya anu bintu bya pa buloba abi. Kadi, ambabi tũng, bu yèyè mwa kusela nsongaakaji muji wa maja, anyi bu yèyè mwa kusela kaayòwa-wa-bayombò, anyi anu ricketta wetu wa mulenga kwìsù, wa cyena leelu ewu? S'cidi cileeja bwalu. Cidi cileeja cidiye naaci mu ende meeji, cya ne ndikù kaayi diikalaye naadi mu matuku acivwavwa, bwalu yèyè awu ngudiye musungule bwa kumukoleshilaye bende bânà. Nenku nansha yèyè awu mwikale wa bishi, mushindu awu ki wakoleshaye bânà abu. Pa nanku, cidi cileeja cidi munda mwa muntu awu. Muntu udi wangata mukaji bu nanku awu, udi uleeja anu cidi meeji adiyè wela bwa matuku acivwavwa.

⁶⁰ Nudiku mwa kudifwanyikijila mwena Kilisto wenza cintu cya mushindu awu anyi? To, mukalenge. Mèmè to. Mwena Kilisto mulelela kaakukebaku baakaayòwa-wa-bayombò baa bulenga bwa kwìsù baa mushindu awu, ne nsongaakaji miji ya maja, ne baakaayòwa-wa-bayombò abu nansha. Yèyè neakebe ngiikadilu wa bwena Kilisto.

⁶¹ Mpindyewu, kwèna anu mwa kwikala ne bintu byònsò to. Nkufwanyine kwikala nsongaakaji kampana mwikale mulenga kwìsù bikole. Ne nsongaakaji mukwabo, pàmwäpa mwikale. . . cipidi cyende ciikale ne mmwenekelu mwîmpè kupita cya ewu ewu. Nenku udi mufwanyine kulekela ewu kwangata mukwabo wawa, kadi, piikalaye kayi ne cipidi cya inäbànzà, cya mukaji. Kabidi, yèyè. . . Mèmè ncyèna ncyuka nî mmulenga kwìsù anyi kî mmulenga kwìsù to. Mbîmpè utangile ku ngiikadilu wende, nansha yèyè mwikale mulenga kwìsù anyi kayi mulenga kwìsù.

⁶² Mpindyewu, bwalu, mbikumbane ne, bu mwena Kilisto ne cya kusungula mukaji wa nzubu, bivwa bikengela kusungulaye mukaji mushuwashuwale, mulediibwe cyakabidi, mmwenekelu

wende nansha mwikale wa bishi. Cidiye aci, ki cidi cimwenza cidiye aci. Ne pashiishe, kabidi, aci cidi cileeja ngiikadilu wa mulume wa difwana dya Nzambi, ne cidi cileeja cidi mu ende meeji ne ciikala mu matuku acivwavwa, bwalu mu wende famiye bânà nebakoleshii bwe kudi mukaji wa mushindu awu, bwa mpàngu ya matuku acivwavwa ya dyende dikù.

⁶³ Yèyè mukasele kamwe kaa ku tu-rickettas twa cyena leelu etu, tuukaayòwa-wa-bayombò etu, cidiye mufwanyine kutekemenaku ncinyi? Ndikù dya mushindu kaayi didi muntu mufwanyine kutekemenana bwa kupeta? Yèyè mukasele nsongaakaji udi kayi ne nsòmbelu mulenga mukumbane bwa kwikalaye ushaala kumbelu bwa kukuba nzubu, kadi muswe kukwata mudimu mu bìrò bya muntu kampanda mukwabo, awu neikale mukaji wa nzubu wa mushindu kaayi? Wèwè's newikale ne bandeji baa bânà ne bikwabo byònsò. S'nyca bushuwa.

⁶⁴ Mpindiyewu, mèmè kaayi ncitu mutambe kwanyisha mmwenenu wa cyena leelu ewu ewu to, wa bakaji baya ku mudimu ewu. Musangu wùmmwènè bakaji abu bavwale bilàmbà bya mushindu umwe, benda banyunguluka mu cimenga eci, babànde pa ntukutuku, ne mbampulushi, ncintu cya bundu be bwa cimenga kana cyònsò cidi cilekela mukaji wenza nanku. Nwamonu anyi? Nwamonu anyi? Padiku bantu balume bûngibù kabayi mudimu to, s'cidi cileeja ngeelelu wa meeji wa cyena leelu wa cimenga cyetu. S'cidi cileeja dipweka dya milongo. Kabvena bikengela bwa twètù kulekela bakaji abu pambelu pààpa mushindu awu nansha. Bòbò kabeena ne cya dyenza pambelu pààpa mushindu awu to.

⁶⁵ Paapeeshile Nzambi mulume mukaji, Yèyè wakamupa cintu civwa citambe bwîmpè civwaYe mufwanyine kumupa, pa kuumusha lupandu. Kadi pakaadi mukaji uya bwa kuteeta kwangata kaaba kaa muntu mulume, pa dibà adi's mmwenze anu bu cintu cidi cibyaçibyaàlè cidi mulume mufwanyine kutwa cyanza. Mpindiyewu, aci's nyca bushuwa. Nwamonu anyi?

Mpindiyewu's tudi mwa kumona ngangàcìlù wa mu nyuma.

⁶⁶ Ndi—ndi mumanye ne aci ncibi, nudi nwela meeji ne ncibi, kadi's m'Bulelela. Twètù katwena tucyuka mushindu udici cibi to, bikengela twètù kukungamangana anu ne bwalu. Aci ncidi Bible ulongesha. Nwamonu anyi?

⁶⁷ Mpindiyewu, apa tudi tumona bitooke tòò ndongamu wa mu nyuma, ndongamu wa Nzambi bwa Cisòmbedi Cyende cìcilwalwà ne Mukaji Wende musela ucilwalwa, wâbangi kumweneka mpindiyewu ewu.

⁶⁸ Muntu yèyè mukasele kaayòwa-wa-bayombò, s'nudi numona cidiye ukeba bwa matuku acivwavwa. Muntu yèyè mukasele mukaji wíkala kayi ushaala kumbelu to, s'nudi numona cidiye ukeba bwa mu matuku acivwavwa. Nenku mèmè musangu kampanda . . .

⁶⁹ Eci cidi cyumvwika cibi be. Ndi ndyumvwa paanyi anu mwa kucyamba's. Ne mêmè—mêmè mwine, pa ciibidilu, mêmè ndyumvwa mwa kwamba cintu aci, bikengela anu ncyâmbè. Ne pa ciibidilu ki citu mmushindu wa Nzambi.

⁷⁰ Mvwa—mvwa ne ciibidilu cya kuya ne mwena mudimu wa mu ferme ûmvwà nkwata nende mudimu, bwa kusumba ngombe. Ki mêmè kumona mukulumpe awu misangu yônsò utangila anu mwîsù mwa ngombe wa lukungulu awu kumpala kwa kwelanganabo mushinga. Pashiishe uvwa utuma mutu wa nyama awu ku luseke, utangila paanyima ne kumpala. Mvwa anu ngenda mmulondesha, mmutangila. Nenku uvwa umutangila kuulu ne kwînshi, ní ùvwa ne mmwenekelu mwîmpè anyi, cipidi cyende. Pashiishe ùvwa ukudimuka ne umutangila mwîsù, ne misangu mikwabo ùvwa ukupa mutu kadi umuka kuya.

Mêmè kwamba ne: “Jeff, ndi muswe nkukonkeku cintu kampanda.”

Yêyè ne: “Ambaaku's, Bill.”

⁷¹ Ki mêmè kwamba ne: “Bwa cinyi udi misangu yônsò anu utangila anu ngombe awu mwîsù?” Mêmè ne: “Yêyè's udi ne mmwenekelu anu mwîmpè, ngombe mwîmpè—mwîmpè wa bujitu.”

⁷² Yêyè ne: “Ndi muswe nkwambile, mwakunyaanyi, wêwè ucidi ne byâbûngì bya kuyiila.” Ki mêmè—mêmè kufika ku dicyumvwa paanyima paa yêyè mumane kungambila. Yêyè ne: “Mêmè nciitu ncyuka mushindu udiye mupayame awu to. Mmufwanyine kwikala anu munyiinyi pa munyiinyi, too ne ku cikono. Kadi yêyè ne lutangilu lwa nyama wa cisuku alu mwîsù, kudidingi wâmusumbakwèè.”

Mêmè ne: “Bwa cinyi nanku, Jeff?”

⁷³ “Ee,” mwakambaye, “cintu cya kumpala cidi ne,” yêyè ne, “kaadyakushalaku musòmbe kaaba kamwe to.” Ki yêyè ne: “Cintu ciibidì, kaakwikalaku maamu wa bushuwa bwa kânà kende to.” Ki yêyè ne: “Mbamwele mu lupangu mpindyewu, ki bwa cinyi mmudyunde. Wêwè mumulekelele anu nunku anyi, ne lutangilu lwa nyama wa cisuku alu, s'mmufwanyine kwikala wenda unyeemakanangana bya mufwanyine wadishipa.”

⁷⁴ Mêmè ne: “Udi mumanye's, ndi mwenze anu bu muyiile cintu kampanda's. Ndi ngiitabuuja ne aci cidi kabidi nanku bwa bakaji.” Cya bushuwa. Cya bushuwa.

⁷⁵ Lutangilu lwa lwonji, lwa lùjooja, lwa ricketta alu, mbipiciibwe ne mushale kule nende's, mulumyana, bintu byônsò bya bleu bidi kumutu kwa mêtù ende abi. Nenku ncivwa... Ncyêna mufwanyine kunanga abi to. Ncyêna ngeela meeji ne abi mbikumbanyine mwena Kilisto to. Nansha mudi télévîsion ne bibejibeji byamba ne mbilenga amu. Ncintu cidi citambe

kwikala cikwacisha bwôwà, cibi kumona cînkaadiku mumone kacya bandela.

⁷⁶ Pâmmwènè aci bwa musangu wa kumpala, ku Cafétéria kaa Clifton eku, dinda kampanda, ku didya dya mu dinda . . . Mémè kumona yimwe ya ku nsongaakaji ayi yilwa kaaba aku. Mwaneetu Arganbright ùcívwa ùbwelelaku, ne mémè. Nenku ùkaavwa mumane kupweka mu nzubu wa panshi. Dya ntangila, ki nsongaakaji awu udi ubwela ewu. Mémè kudyambidila ne: “Ee, ncyè—ncyè—ncyè—ncyèna mumanye to.” Kacya ncív waku mwanji kucimona kwônso aku to. Cívwa ncyá mushindu kampanda. Kaa, bivwa bimvweke bu ne yèyè uvwa mudya kudi kamunguji’s, nudi bamanye’s, anu bu mmwenekelu wa mushindu wa wenza tuseku. Ncyèna ngamba nanku bwa kwikala kusekeshangana to. Ndi—ndi ncyamba. Nudi bamanye ne, mémè ewu nkaadiku mumonemone nsudi. Ndi missionnaire. Nkaadi mumonemone balema baa mishindu yônso, nudi bamanye’s, bifumine ku màsaamà. Nenku nkaavwa nkeba kuya kudi nsongaakaji awu bwa kumwambila ne: “Mémè ndi—ndi—ndi mwambi. Ntu—ntu nsambidila babeedi. Udiku—udiku mwa kwitaba bwa nkusambidile anyi?” Ne mémè mwine kacya ncív waku mwanji kumona cintu cya bu nanku awu to. Nenku pashiishe, ki bakwabo babidi anyi basatu bàlwalwà aba, babwela. Mémè kwenza bu wadisaki paanyima kadi kwindila.

⁷⁷ Ki Mwaneetu Arganbright kuvwilapu, ki mémè ne: “Mwaneetu Arganbright?” Yèyè udi mwa kwikala kaaba aka. Mémè ne: “Ncinyi cidì kaciya cyenda bìmpè ne mukaji wawa?” Nwamonu anyi?

Ki yèyè ne: “Cyacya, s’mbilaabu bya kwìsù.”

⁷⁸ Mémè ne: “Ee, ekelekele, ekelekele!” Nwamonu anyi? Mémè kudyambidila ne bivwa bikengela kwikalabo bamuteeke mu nzubu wa beena nsudi mwaba kampanda, nudi bamanye’s, bwa ne disaamà adi kadìlu kutampakeena bakaji bakwabo bônso.

⁷⁹ Kadi, nudi bamanye’s, bikengela wèwè kwenza mpàngù, kutangila, kusambila, paudi usungula apu. Bwalu, tudi tumona, ku cyòci eci, Diyì dya mulayi. Yèyè awu, mukaji wa kusela udi muntu mufwanyine kusungula awu, nealeeje ngiikadilu wa mulume awu. Cidi cileeja cidì munda mwende.

⁸⁰ Mpindyewu, nudiku mwa kudifwanyikijila muntu, mùle tente ne Nyuma Mwìmpè, wangata cintu bu nanku bwa kwikalaci mukajende anyi? [Disangisha didi dyamba ne: “To.”—Muf.] Mémè—mémè—mémè ncyèna mmonaku nanku to, mwaneetu. Mpindyewu, pàmwâpa mémè ndi anu muntu wa cimfiikamunda wa kale’s. Kadi, nudi bamanye’s, mémè—mémè ncyèna mwa kuumvwaku aci to, nwamonu’s, monaayi, bwalu necileeje cidì munda mwende amu. Yèyè mukaji awu’s ki wàmukwàcisha bwa kulongolola díkù dyèndè dicív wawwà.

⁸¹ Mpindyewu, pashiishe, patudi tushintulula mpindyewu bwa katanci, twalukila ku luseke lwa nyuma. Kadi paudi umona ekeleeziya udi mu maalu a pa buloba, wenza maalu bu baa pa buloba, usankila mu maalu a pa buloba, wabanyangana maalu ne baa pa buloba, wangata Mikenji ya Nzambi bu ne Yèyè kî ngutuku muYifunde kacya to, pa dîbà adi's udi—udi anu mwa kudifwanyikijila ne Kilisto kaakwangataku Mukaji-musela wa nanku to. Udiku mwa kudifwanyikijila wàngata ekeleeziya wa cyena leelu leelu ewu ewu bu Mukaji-musela anyi? Bwa Mukalenge wanyi mêmè to. Ncyèna . . . Ndi mufwanyine kumona aci anu bangaafunya's. To. Vulukaayi, mpindyewu, mulume ne mukajende badi muntu umwe. Wèwè udiku mufwanyine kudiswika ne muntu wa nanku awu anyi? Bu wèwè mwa kwenza aci, ncifwanyine bulelela kwela diitabuuja dîndi naadi kûdi mâyi ku makàsà.

⁸² Nenku, pashiishe, ambaayaaku tûng Nzambi uDiswika ne cintu cya nanku awu, ndumba wa cyena mangumba wa ciibidilu ewu? Nudi nucinka ne mMufwanyine kucyenza: “Biikale ne cimwenekelu cya difwana dya Nzambi kadi biikale bavila bukole bwadi”? Kî mMufwanyineku kucyenza to. Mukaji udi ne cya kwikala munda mwende ne ngiikadilu Wende Yèyè. Ekeleeziya wa cya bushuwa, mulelela, mulediibwe cyakabidi udi ne cya kwikala ne ngii—ngiikadilu uvwa munda mwa Kilisto awu, bwalu mulume ne mukajende badi umwe. Ne piikalabi ne Yesu uvwa wenza anu civwa cisankisha Nzambi, ulama Dîyi Dyende ne umwenesha Dîyi Dyende, nebikengele bwa Mukaji-musela Wende kwikalaye ne ngiikadilu wa mushindu umweumwe awu. Kî mmufwanyineku, nansha bishi, kwikala dingumba to. Bwalu, pa dîbà adi, byûdî muswe kwamba nansha biikale bishi ne, “to,” yèyè udi ukontononyiibwa kudi kasumbu kaa balombodi kaa mwaba kampanda, kâdi kâmwâmbilâ cya dyenza ne cidiye kayi mwa kwenza, ne, misangu yâbûngi, mùliyò wa kilomeeta kule ne Dîyi dilelela.

⁸³ Bidi byenza bibi be bwa mutukaadi baye kule ne Mulombodi mulelela utu Nzambi mutushiile bwa kulombola Ekeleeziya. Kacyakacya Yèyè katuku mutume bakulu batangidi baa ditunga to. Katuku mutume bepiskopo, baakardinale, bansaserdose, baapaapa to. Yèyè utu mutume Nyuma Mwîmpè bwa Ekeleeziya, bwa kulombola Ekeleeziya. “Piikala Nyuma Mwîmpè Yèyè mulwe, Yèyè neanulombole mu Bulelela bwônso, neanubuulwile maalu aa, ândi Mêmè munwâmbile aa, neanuvulwijewu, ne neanuleeje maalu acivwavwa.” Nyuma Mwîmpè nguvwa ne cya kwenza aci. Mpindyewu, ekeleeziya wa cyena leelu udi yèyè ukina Aci. Bôbô kî mbaCiswe to, pa nanku mmunyi mudiye mufwanyine kwikala Mukaji-musela wa Kilisto? Bantu baa leelu ewu badi bôbô basungula dingumba dya cyena leelu. Cîdî aci cyenza, cidi anu cileeja ngumvwilu wabo mushaadile wa Dîyi.

⁸⁴ Ncyêna ne meeji a kutapangana ku mwoyi to, kadi ndi ne meeji a kucipwekesha mu ndondo bikumbane mu mushindu wa nwênù kucitangila.

⁸⁵ Nkaadiku muswikeswike bantu bààbùngì mu makaba, kadi citu anu misangu yònsò cimvulwija Kilisto ne Mukaji-musela Wende. Dimwe dya ku mabaka àngààkaswikà mwaba ewu, kukaadi cikondo kampanda, civwa—civwa cintu cya pabwaci menemene mu nsòmbelu wanyi. Ncyenzeke kukaadi bidimu mulongolongo, pàncìcìvwà anu mwambi wa kànàkànà.

⁸⁶ Mwakunyaanyi wa balume uvwa wenza mudimu ku—ku PWA. Ncyêna mumanye ne, kucidiku muntu, mucikàle uvuluka aci, anyi to, muntu kampanda wa bukole bwanyi ebu. Nenu aci civwa mmpà—mmpàngù yivwa naayi mbulamataadi. Nenu mwakunyaanyi wa balume uvwa wenzaku mudimu, mu ntanta wa kilomeeta mitwe ku makumi anaayi ne mwandamukulu. Bavwa bumbula majiba kampanda, mpàngù ya dilama dya bufuki.

⁸⁷ Nenu kuvwa nsongaalume mukwabo uvwa wenza mudimu kwine aku, benza nende, wa mu Indianapolis, mu ntanta bu, kaa, ntanta wa kilomeeta yipacila ku lukama makumi asambombo lwà kumutu kwa Jeffersonville mündi mêmè—mêmè musòmbèle, anyi mùmvwà musòmbèle mwamwa. Nenu kuvwa... Kwambilaye mwakunyaanyi wa balume awu, dîngà dituku, kwambaye ne: “Doc,” mwakambaye, “ndi—ndi muswe... Ndi ne dijinga dya kubwela mu dibaka, bu mêmè mwa kupetaku mfranga mikumbane ya kufuta muyiishi.” Yêyè ne: “Ndi—ndi ne mfranga mikumbane bwa kupeta mukanda wanyi wa dingaanyishila, kadi,” yêyè ne, “ncyêna ne mfranga mikumbane ya kufuta muyiishi to.”

⁸⁸ Doc kwambaye ne: “Ee, tùtùwânì utu muyiishi, ne—ne yêyè—yêyè’s udi mwa kunuswika mu dibaka.” Yêyè ne: “Yêyè kacya katuku ulombangana mfranga bwa bintu bu nanku to.”

Yêyè kwamba ne: “Udiku mwa kumukonka bwa anyisheku answika mu dibaka anyi?”

⁸⁹ Ee, ki diloolo adi mwakunyaanyi wa balume awu kunkonkaye. Mêmè ne: “Piikalabi ne kabatu banji kumuswika mu dibaka kacya kwònsò eku to, yònsò wa kudibo, ne bôbô biikale... byònsò bidi anu bîmpè.”

Yêyè ne: “Ee, eyo, nênkamukonkè.”

Ki mêmè ne: “Byòbì nanku, umwambile, alwe.”

⁹⁰ Nenu, patwakafika mu diisambombo ki nsongaalume awu kulwaye. Citu ncintu cinene bwanyi mêmè, pântù anu misangu yònsò mpingaja meeji ku bwalu ebu. Ndi mufwanyine... Mu mapingaja mùvwà mvula uloka, ki kashinyi kaa kale kaa Chevrolet, ne myëndù ya mpala miswikakaja ne nkanu, kwimanaku, kumpala aku. Anu ntanta mukese paanyima paa

mémè mumane kufwisha mukajaanyi, ne mvwa musòmbe bu mbàlakà, tuubibambalu tukese tubidi. Ne—ne Doc uvwa naanyi mwine amu, twètù babĩndile.

⁹¹ Ki—ki nsongaalume kupatukaye mu kashinyi aku, ne yèyè mwine kayi umwekaku bulelela bu mubaki to, bwanyi mémè, anyi bwa nĩ nganyi yònsò, ngeela meeji. Eyo. Mémè wa bende mvwaku mwa kusumba mukolo wa bisabaata mwĩmpè menemene, ku mushinga wa ndola umwe ne citupa. Kadi yèyè uvwa muvwale mukolo wa bisabaata, bivwà bisunsuke byònsò. Ne mupanu wende uvwa mumuzebelele anu menemene. Kabidi ùvwa muvwale kamwe kaa ku tuujàketè twebè twa kale twa ndanda etu. Ncyèna ngeela meeji ne bamwe baa kunudi nwènù bakulumpe aba nudiku bafwanyine kuvuluka to. Kavwa kamweke anu bu ne bavwa bakapicishile mu mashinyi a disukula naawu bilàmbà kadi kabayi bakasampulule to, ne kavwa ne tushoonyi tushoonyi, cikupa cibunya mushindu *ewu*, ne ditumba adi dyambuluke muulu.

⁹² Ki kanso—kansongaakaji katekete kupatukilaku ku luseke lukwabo, kavwale, kaa, kamwe kaa ku tunkanzu twa tukese tumweke bu twa matobamatoba atu.

⁹³ Ncyèna mumanye to. Ngàkatùpakana mu dibiikila dya bintu bya mushindu awu abi, mũngà musangu. Gingham, ngeela meeji mmutubo bacibiikila. Nenku civwa . . . [Disangisha didi ditudika mu tuseku—Muf.] Ngăcyămbì kabidi anu bibi's. Ntu—ntu anu ncyenza's. Ki mémè kwamba . . .

⁹⁴ Kupatukaye mu kashinyi aku, nenku bôbò kubànda bibandilu abi. Nenku—nenku paakabwelabo, kakwacikwetu cyo, nsongaakaji awu . . . Ngeela meeji, yèyè, pabwipi ne cyende ayònsò civwayeku muvwale civwa anu jipè. Ne yèyè mwine kavwaku nansha ne bisabaata byetu ebi to, ku makàsà. Ùvwa mulwe wenda ulomba bwa kumwambulabo cyanaana mu mashinyi a bende kuumukila ku Indianapolis, too ne mwômò amu. Ùvwa ne nsuki yende mikese mipweke, lwà paanyima, bayiluke bipya bya mushindu kampanda, bile, bimupwekele lwà paanyima. Ùvwa umweka mwànà be.

Ki mémè kumwambila ne: “Ukaadi bukole bukumbane bwa kubwela mu dibaka anyi?”

⁹⁵ Yèyè ne: “Eyowa's, mukalenge.” Ki yèyè ne: “Ndi ne dyanyisha dimfundila kudi taatù wanyi ne maamù.” Yèyè ne: “Bivwa bikengela mémè kudileeja ku—ku tubàdì muneemu emu, bwa kupeta mukanda wa dingaanyishila.”

⁹⁶ Mémè ne: “Eyo.” Mémè ne: “Ndi muswe ngaakuleku neenu ndambu kumpala kwa twètù kuswika dibaka edi.” Kusòmbelabò panshi. Nsongaalume uvwa anu wenza kukenzakana mu cibambalu amu; bivwa bikengela anu bamukoseku nsuki ayi. Ki kwikalaye anu wenza kukenzakana mu cibambalu amu. Kavwa

anu uteeleja to. Mêmè ne: “Mwanaanyi wa balume, ndi muswe wikale muteeleje cîndi ngamba eci.”

Yêyè ne: “Eyowa’s, mukalenge.”

Ki mêmè ne: “Udi munange nsongaakaji ewu anyi?”

Yêyè ne: “Eyowa’s, mukalenge. Ndi mumunange.”

Mêmè ne: “Udi munange nsongaalume ewu anyi?”

“Eyowa’s, mukalenge. Ndi mumunange.”

⁹⁷ Mêmè ne: “Mpindyewu, ukaadi ne nzubu wa wêwè kuya kamuteeka paanyima paa nwênù bamane kubwela mu dibaka anyi?”

Yêyè ne: “Eyowa’s, mukalenge.”

⁹⁸ Mêmè ne: “Eyo. Mpindyewu,” mêmè ne, “ndi muswe nkukonkeku cintu kampanda. Ndi muumvwe ne utu wenza mudimu ku PWA eku.”

Ki yêyè ne: “Eyowa’s, mukalenge.” Difutu divwa diipacila ndola dikumi ne yibidi ku lumingu.

Mêmè ne: “Udi wela meeji ne udi mwa kumulongolwela nsòmbelu anyi?”

Yêyè ne: “Nêngênzè mwanyi paanyi mwônso mûndi mwa kwenza amu.”

⁹⁹ Ki mêmè kwamba ne: “Ee, abi mbîmpè.” Ki mêmè ne: “Mpindyewu, amba tûng bu yêyè mwa kupatuka mu. . . Amba tûng bu yêyè mwa kujimija mudimu ewu, mwaneetu wa bakaji? Ciwenza ncinyi, neunyeeme walukile kwenu, kudi maman, ne papa anyi?”

Yêyè ne: “To, mukalenge. Mêmè nênshaalè nende yêyè.”

¹⁰⁰ Ki mêmè ne: “Amba tûng, mukalenge, bu wêwè mwa kupeta bânâ basatu anyi banaayi, kuyi ne cya kubadiisha, ne kuciyi kabidi ne mudimu. Ciwenza ncinyi, neumwipate anyi?”

¹⁰¹ Yêyè ne: “To, mukalenge. Nêntungunukè anu ngaadikuma eku ngaadikuma eku. Netucimune bwalu abu, mu mushindu kampanda.”

¹⁰² Mêmè kudyumvwa mukese be. Ki mêmè kumona ne ùvwa mumunange cya bushuwa, ne bavwa banangangane. Mêmè kubaswika mu dibaka.

¹⁰³ Pashiishe mêmè kwikala ndikonka kwakayaye nende ne mpenyi. Matuku ndambu, mêmè kukonka mwakunyaanyi wa balume awu, Doc, ne mpenyi. Yêyè ne: “Pweka nda mu New Albany,” kaacimenga kakese lwà kwinshi kwetu twêtù aku.

¹⁰⁴ Nenku lwà kumpenga kwa musulu kwaka, kûmvwà ne cilatalata kampanda citeeka kuntwaku, kûmvwà nya bwàcyà-bwilà pâmvwà—pâmvwà mulongolodi wa nshinga ya nzembu. Nenku bakwanyî bônso, pavwabo basômbe beele cijengu, benza bilele ne bikwabo bintu apu, mvwa mwa kubwela mu kaapikepe

amu ne kupweka lubilu ku musulu ne kusambilaku pa diine dîbà adi, mwômò mwine amu, ne mbala Bible wanyi, mwinsi mwa cipese cinene cya cilatalata muvwa midimu ya kale ya byamu ne ciibidilu cya kwenzekela amu. Kudi mushiki wa makaadika a kale mateeka kwinsi aku.

¹⁰⁵ Nenu mukwetu ewu uvwa mupweke kwine aku ne mupete dimwe dya ku makaadika awu kadi kupanda ne scie e kutubulamu mushiku wa mbelu. Ne uvwa mwangate cibejibeji ne mvuma.

¹⁰⁶ Mbanganyi badi bamanye ne mvuma ncinyi? Nanku, kakwena beena Kentucky mwaba ewu to. Cidi, wangata kapese kaa cikandakanda, wela mwômò kasonso kaa dyasa naaku ne cyâlâ, kaamusonso kakese. Ne pashiishe ukasakila mu... Ki mvuma nyêve awu.

¹⁰⁷ Pa nanku, bavwa bayiteeke myaba yônsò. Nenu uvwa muye ku mwaba wa midimu ya byamu aku mukapete cintu kampana, ne mwenze cibândilu, bwa kwikala kubândilapù. Nenu mwangate bisheetesheete bya kale, mudyênzèle meesa. Ki mêmè kudyambidila, dîngà dituku ne: “Nênganjì anu kukupweka nkamone mudibo basòmbèle.”

¹⁰⁸ Ngondo bu yisambombo nanku awu kumpala kwa ciine aci, mêmè kuswika dibaka dya mwânà wa bakaji wa E. V. Knight ne mwânà wa balume wa E. T. Slider. E. V. Knight, umwe wa ku bantu badi batambe kubanjika badi ku Musulu wa Ohio, ne, kaa, mwikale ulombola byapu binene kuntu kwônsò aku, bidi byenza nzubu ya dilamakaja eyi, ne bikwabo. Ne—ne Slider, E. T. Slider, nkumpanyi wa lusenga ne nsoka, bânà baa beena tente mu nzubu tente pambelu. Nenu mêmè nguvwa mubaswike mu dibaka.

¹⁰⁹ Ki mêmè kwalukila mu mwaba kampana, ngambulula bintu abi munda mwa mbingu mitwe ku yibidi, mwikale nkwalukila mu kazubu kaa cisokomenu kampana ne ntwà binù pa musaamu. Nenu bintu byônsò bya mikùùkùku ne bikwabo bînkaavwàku mupicilepicile, cibwîpi ne byônsò, bivwà bikèngelà bwa mêmè kupicila abi, bivwa mbwa kuswika kwa babaka babidi abu! Kadi paakatukabo, mona's, bavwa... Aba babaka bakwabo baa bakese aba bavwa anu mwaba awu mu kaacibambalu kakese kaa kale mutuvwa anu ne kankwasa kaa fôteyè kakese ne kalaalu kaa dibunya, kadi mabaka ônsò abidi awu avwa maswikiibwe ku mushingà anu umweumwe awu.

¹¹⁰ Ki pashiishe, dîngà dituku, meeji kumvwilawu bwa mêmè kupweka bwa kamwenekelaku babaka babanji abu. Kabivwa bikengela bwa kwikalabo benza midimu to, baatatwábò bavwa beena tente mu nzubu tente pambelu, babîbakile nzubu mulenga wa tuyaayi tukamone. Bwa kwamba menemene, E. V. Knight ewu, kuntu kwaka, pa kakuna apa, byende bikwacidi bya ku biibi bidi karats dikumi ne yinaayi ku nzubu wende munene wa dikema awu, pa nanku nudi anu mwa kudifwanyikijila ne

mmu nzubu wa mushindu kaayi mudibo basòmbèle. Kabivwa bikengela bwa kwikalabo benza midimu to. Bavwa ne mashinyi malenga a Cadillac avwabo bàbàpèèsha ku cidimu ne ku cidimu. Kadi nyawu, bacíkàle anu bânà, bakaavwa ne byònsò bivwabo naabi dijinga. Pângààkakùbàndà dîngà dituku . . .

¹¹¹ Mpindyewu, mushindu wîngààkamanyanganà naabo bôbò biine abu, umwe wa ku balunda baabo uvwa mulunda wanyi mwîmpè. Tuvwaku bônso anu balunda. Nenku mwine mushindu awu ki utwakamanyangana, paakandombabo bwa mêmè kubaswika mu dibaka.

¹¹² Pa nanku mêmè kuyaku bwa kubamwenekela. Mêmè kupatuka mu kashinyi kaanyi kaa kale kaa Ford, pambelu apu, ki mêmè kubànda bibandilu. Ki—ki mêmè kubànda, kusemena pabwîpî ndambu, ki mêmè kubumvwa baakula. Kadi bavwa bakokangana eyo. Bavwa bumvwilangana mikawu ewu ne ewu. Bavwa baye ku dija dya maja. Mukaji uvwa nsongaakaji mulenga kwîsù webe wa dikema. Ne yèyè mwine uvwa anu bu umwe wa ku baakaayòwa-wa-bayombò beetu aba. Ûkaavwa mupetepete matapishi bûngî cyanaana a bulenga bwa kwîsù nu nyungulukilu mwònsò amu, ne mupete ne ndambu wa mashinyi ne bikwabo, bwa diikala dyende dya bu kaayòwa-wa-bayombò adi. Ki mêmè kubatangila, ewu musòmbè mu edi ditumba ne ewu musòmbè mu dikwabo, bakokangana bwa nsongaalume kampanda uvwaye muje nende, anyi nsongaakaji kampanda, cintu kampanda.

¹¹³ Ndi mwenze anu nseemena nunku anyi, lukasa ndwabo kadi bôbò kumba kutupikilangana ne kushaala bakwatangane mwaba awu, ku byanza byabo—byabo, mwaba awu, kulwabo benda tamakatamaka batangile ku ciibi. Bôbò ne: “Mona’s, wetwawu, Mwaneetu Branham! Maalu kaayi wèwè’s?”

Mêmè ne: “Bîmpè. Nwênù nudi peenu bishi?”

¹¹⁴ Bôbò ne: “Kaa,” mwakamba mulume, “mêmè—mêmè . . . Twètù kaayi tudi ne disanka dya nyeke. Kî mmwômò anyi, munanga wanyi?”

Ki mukaji ne: “Eyowa’s, munanga wanyi.” Nwamonu anyi?

¹¹⁵ Mpindyewu, nwamonu’s, udi uleeja cintu kampanda cidi kaciyi cilelela to. Mpindyewu, kwèna mwa kupeta luuya ku mudilu muzola to, mudi yimwe ya ku ekeleeziya eyi yidi yiteeta kuzola mpenta, ku cintu kampanda cyàkenzekà kukaadi bidimu cinunu anyi kukaadi bidimu binunu bibidi. Kwèna mwa kupeta luuya ku mudilu muzola to. Mpenta ngwa cya bushuwa leelu ewu anu mwakadiye musangu awu. Nwamonu anyi? Eyo. Mudilu uciidi anu umata. Kî mmudilu muzola to. M’Mudilu anu wetu wa cya bushuwa ewu.

¹¹⁶ Pa nanku, bôbò, ki bôbò abu mwaba awu mene. Nwamonu anyi? Mêmè—mêmè ncyèna mufwanyine kujinga kwikalala ne nsòmbelu wa mushindu awu to.

117 “Kaa,” mwakamvwila meeji, “udi mumanye’s, anu lwa kwinsi kwaka luseke lukwabo lwa lubwebwe lwalwa ne kumpenga kwa musulu kwaka, s’ki kudi babaka bakwabo abu bakasòmbèle.” Meeji kadi kumvwila ne: “Diisambombo dikwabo mu mapingaja nênyemù cintuluntulu bwa mmonebi mudibo basòmbèle.”

118 Nenku mêmè, ne manyaanu kwîsù, muvwale cinsalabeeta cya manyaanu, mwambule byamu byanyi bya mudimu. Mêmè kudiyambidila ne: “Bôbò’s nebampapuke cintuluntulu.” Mêmè kubatuulukila byenze bu ne mvwa muye ngenda nkenketa bizubu bya nshinga ya nzembu bivwabo bataayishe kudi mikenyi ya mvula anyi cintu kampanda, ne pâmvwà ngenda ndonda nshinga wa telefone, nshinga ya nzembu yîvwà yenda yilonda musulu ayi. Nenku ki kashinyi kaa kale kaa Chevrolet kaka, kiimanyika pambelu kumpala kwa nzubu. Bu paanyima paa cidimu cijima nanku awu, paanyima paa mêmè mumane kubaswika mu dibaka. Nenku kuvwa nnanì—nnanì... Ciibi civwa cyunzulula, nenku mvwa mwa kuumvwa muvwabo bayiikila. Pa nanku eci cidì cimweka anu bu mwena lubombo’s, kadi mêmè kuseemena pabwîpî mu mushindu mukumbane wa mêmè mufwanyine kuteeleja, kumona ne civwabo bamba ncinganyi. Mêmè kwimana mwaba awu. Nenku ntu anu muswe kudimanyina, mêmè mwine.

119 Ntu mêmè muswe kujandula ne kwikala mutwishiibwe ne ndi mumanye cîndi ngamba. Mushindu awu ngwîntù ngenza pa bidi bitangila Dîyi dya Nzambi. Didi Bulelela, anyi kaDyena Bulelela? Yêyè neashaale mukwate ku Dîyi Dyende, anyi Katu ushaala mukwate ku Dîyi Dyende? Piikalabi ne Kêna ushaala mukwate ku Dîyi Dyende, dîbà adi Kêna Nzambi to. Nwamonu anyi? Yêyè ushaala mukwate ku Dîyi Dyende, Udi Nzambi. Nwamonu anyi?

120 Nenku mvwa muswe kumona ne bavwa basòmbè bishi. Ki mêmè kudifindila lwà kumpenga aku, biteketebitekete anu bya menemene ebi. Mêmè kuumvwa mulume wamba ne: “Kaa, munanga wanyi, mvwa ne dijinga dyàbûngî be, dya kukwangacila yêyè awu.”

121 Awu ne: “Mpindyewu, anji tangila, munanga wanyi.” Yêyè ne: “Ewu nkanzu’s udi anu mwîmpè.” Yêyè ne: “Mona’s, ewu’s udi anu mwîmpè.” Yêyè ne: “Ndi mwanyishe aci. Kadi udi umona ne . . .”

122 Mêmè kudifinda e kuseemena, bwa mêmè kumona mwa kutangidila mu mutanta, mwaba uvwa ciibi cisàka kadi cishaale cipèngeleka mwine mu dikaadika amu. Nenku ki mulume wawa, musòmbè mwômò amu, ne mukaji mumusòmbè pa bibelu; ne diboko dyela mukaji kunshingu, ne diboko dya mukaji paadi dimwela kwende kunshingu. Nenku uvwa ne cimwe cya ku bifulu bya kale bya lutanda lunene ebi, ne ùvwa

mutubule kaadisoso kakese, mukabeeteleje, mu lusongo amu, ki kupatulamu shekè wa difutu dyende, mwômò amu. Ûvwa—ùvwa mumuteeke pa meesa. Yêyè kwamba ne: “Bûngì *kampanda* bwa byakudya. Bûngì *kansanga* bwa assurance. Ne bûngì *kankenga* bwa mashinyi.” Kadi kabayi mwa kudya nshima kuntwadijilu too ne kundekeelu kwa ngondo to. Mêmè kufika ku dijandula ne, ùvwa mukamwène kankanzu kampanda mwamwa pa dididiishi, wenza wàkâtânîla anu kukâtàngîla munda mwa mbingu yibidi mijima, kàvwà kàyîlâ mushinga wa ndola umwe ne bya mu njila. Ûvwa muswe kukàsùmba. Kwambaye ne: “Ee, munanga wanyi, s’udi mufwanyine kumwekamu mwîmpè be.” Kadi yêyè mulume kwamba ne . . .

123 Mukaji kwambaye ne: “Kadi, munanga wanyi, s’ndi ne—s’ndi ne nkanzu. Kabyena anu bikengela ngii—ngiikale ne awu to.” Nwamonu anyi? Kadi kaamukalenge-mukaji aku . . .

124 Mêmè kwalukila cyanyima, kwambulula mèsù. Mvwa mwa kumona ka—kaleyî ku lusongo lwa nzubu mukwabo awu. Mêmè kushaala mwimane mwaba awu ntangila, ndambu wa tusunsa. Mêmè kudyambidila ne: “Mubanji ki wepi?” Mêmè kudyambidila ne: “Byôbî ne, wêwè Bill Branham, wêwè muswe kusungula mwaba ku yôyî eyi, udi mufwanyine kuya ku wêpî?” Bwanyi mêmè, ncyênâku mufwanyine kwangata cintu cilenga cidî pa lusongo lwa mukuna cyacya to. Ndi mufwanyine kwangata ngiikadilu udi kwinshi eku ewu, bu mukaji wa nzubu wa cya bushuwa, muntu kampanda wa munnange ne ushaala naanyi, muntu kampanda wa uteeta kwenza dîkù; kadi kî ngwa ukuzololoja anu mashi bwa cintu kana cyônsò, bwa bilâmbà bya bibalakana ne bilengà bya kudilengeja naabi to; kadi muntu mwikale neebe, mwikale citupa cyebe.

125 Aci citu misangu yônsò cishaale anu cindamate, mushindu uvwaci awu. Umwe uvwa musungule nsongaakaji mulenga kwîsù, mukwabo yêyè uvwa musungule ngiikadilu. Mpindyewu, mushindu umwepele wûdî mufwanyine kusungula ngwôwù awu. Dyambedi, kukeba ngiikadilu; ne pashiishe, pawikala mumunange, mbîmpè.

126 Monaayi, Adama wa kumpala wa Nzambi awu kavwa ne disungula nansha dimwe to, bwa wende mukaji. Yêyè kaakapeta disungula to. Nzambi wakamwenzela anu mukaji, ne yêyè kavwa ne bwalu bwa kumusungula to. Pa nanku tudi tujandula ne yêyè mukaji awu wakamupambula kumuumusha ku Dîyî dya Nzambi. Kààkapeta mpùngà wa kusambila bwa bwalu abu to. Yêyè—yêyè—yêyè kèna bu wêwè ne mêmè to. Yêyè kaakapeta disungula to. Ne kabidi, mu kwenza kwa cyôcî aci, mukaji awu wakumulombola kumuumusha ku kaaba kende kajaalame kaa kwikala mwânà wa balume wa Nzambi. Ne wakacyenza mu dileeja mulume mushindu wa nsòmbelu mutambe kwikala wa cyena leelu, cintu civwa kaciyi cikengela bôbò kwikala benze to. Kadi ngiikadilu wa mukaji awu wakaleeja anu ne

uvwa mupiile. Tubingila ne twipacila twende tuvwa anu tubi. Ki kumuswishaye, ku dilukakaja dyende dya lungenyi, ne bukênkè bupyabupya bwa cyena leelu buvwaye mupete, buvwà bubengangane ne Dìyì dya Nzambi abu, kibuvwa mushindu mutambe bwîmpè wa nsòmbelu.

¹²⁷ Nenku mbakaji bûngì kaayi leelu wa Ndaaya ewu, nî ngèku nî ngèku, balume, badi bafwanyine kukoka mukaji mwîmpè kumusaka kule ne Nzambi, anyi kukoka mulume mwîmpè kumusaka kule ne Nzambi? mu kuteeta kumwanbila ne: “Ewu ntendeleelu, nwênù nsongaalume ya beena Mpenta eyi, ntendeleelu awu,” mudibo bamba’s, “kaa, awu ngwa cyena kale, ngwa bantu baa meeji a cyena kale, kanwitabuujiku abi to.” Bikengela wêwè kusambila bikole kumpala kwa kusela nsongaakaji awu. Nansha yêyè mwikale mulenga wa bishi. Cintu cimwecimwe aci bwa mulume.

¹²⁸ Mukaji wakamuswisha bwa kupatukaye mu diswa dya Nzambi ne wakamufikisha ku dyenza cintu civwa kacyi cikengela yêyè kwikala mwenze to, ne, ku cyôci aci, wakakebela bukwabantu bwônso nkòong lufu. Ki bwa cinyi Bible udi umukandika bwa kulongesha, anyi bwa kuyiisha, anyi bwa kulenga Dìyì dya Nzambi, mu mushindu kana wônso.

¹²⁹ Ndi mumanye, nwênù bânà beetu baa bakaji, bààbûngì baa kunudi badi bamba ne: “Mukalenge mmumbiikile bwa kuyiisha.”

¹³⁰ Ncyakukokangana neebe to. Kadi nênkwambilè ne, Dìyì ndidi dikwambila bwa kùcyênji to. “Mukaji kalongeshi to, anyi kangaci bukookeshi nansha bwa bishi to, kadi ikale yêyè anu mupuwe.”

“Ee,” mùdi wamba, “Mukalenge’s ngudi mungambile bwa mêmè kucyenza.”

¹³¹ Ncyêna ngeelaku aci mpatà nansha mikese to. Uvwaku muumvwe Diyiisha dyanyi dya dituku adi pa bidi bitangila Baalama anyi? Baalama wakapeta dipangadika dya kumpala, dya buludi dya Nzambi ne: “Kùcyênji nansha.” Kadi yêyè kutungunuka anu ne kukutakana too ndekeelu wa byônso ne mwakalwa Nzambi kumwambila bwa kucyenzaye.

¹³² Nzambi mmufwanyine kukwanyishila bwa kuyiisha. Ncyêna ngamba ne kî n’Yêyè udi mukwanyishile to. Kadi kî mbilondeshile ku Dìyì ne ndongamu Wendè wa ku cibangidilu nansha. “Bwalu yêyè bikengela ikale mu dikookela, bu mudi kabidi mikenji yamba.” Ncyà bushuwa. Ki bwa cinyi, yêyè kêna ne cya kucyenza nansha.

¹³³ Mpindyewu, monaayi kabidi mudi mukaji-musela wa mu mubidi mwikale cimfwanyi cya wa nyuma. Dìyì didi dyamba, ne: “Yêyè wakenjiibwa bwa mulume, kadi kî mmulume wâkenjiibwa bwende yêyè to.”

134 Mpindyewu nêngààkulè ne, mbwa cinyi, mu ndambu wa tusunsa, pa Mukaji-musela wa Kilisto, kadi ndi nteeta kunuleeja nshindameenu waci.

135 “Mukaji wakenjiibwa bwa mulume, kadi kî mmulume bwa mukaji to.” Ki kabingila kadi kenza ne, mu mikenji ya kale, disela dya bakaji bààbûngì divwa dikumbanangane ne mikenji. Tangilaayi numone Davidi musòmbe pààpa ne bakaji nkama yitaanu, kadi Bible mmwambe ne: “Ûvwa muntu wa pa mwoyi mene wa Nzambi.” Mwikale ne bakaji nkama yitaanu, ne Solomo ne cinunu, kadi nansha umwe wa ku bakaji abu kavwaku mwa kwikala ne mulume mukwabo nansha.

136 Angataayi mukaba wanyi wa mêtì pa *Dibàkà Nè Dishipa Dyà Dibàkà*. Cyôcì aci, ku lusongo lwa mukuna mu Tucson, mwaba ewu anu abidi adi panshi aa, mvwa mubànde kwòkò aku mwikale nsambila bwa bwalu abu. Baakapatula bàna mu tulaasa, bwa kubandilabo muvwa Dikunji dya Kapyà adi dinyungulukile mukuna ne dyangate mmwenekelu wa mulongoji, ditwa kumpala ditwa paanyima, dibànda dipweka. Bantu baa mu nyungulukilu emu mbacimanye, kwòkò aku, ne bavwa baDimone; ne Dyôdì. . . pavwaYe mungambile Bulelela bwa nkonko eyi ya pa dibaka ne dishipa dya dibaka. Kwòkò kwikale luseke lumwe luya mu *nunku*, ne lukwaba luya mu *naka*, kudi ne cya kwikala Bulelela mwaba kampanda. Paanyima paa Bitampi Mwandamutekete abi, ki Yêyè kuleeja civwa Bulelela bwa bwalu abu.

137 Monaayi, mpindyewu, yêyè uvwa ne cya kwikala ne mulume anu umwepele, bwalu: “Mukaji wakenjiibwa bwa mulume, kadi kî mmulume bwa mukaji to.” Nkama yitaanu yònsò nkòòng ya bakaji ayi yivwa anu mukaji wa Davidi, ne civwa ncimfwanyi. Pààsombà Kilisto pa Nkwasa wa butumbi mu Bukalenge bwa bidimu cinunu, Mukaji-musela Wendè kaakwikala muntu umwepele to, kadi nebiikale binunu makumi, Mukaji-musela, bònsò abu mu Umwepele. Nenku Davidi uvwa ne bakaji bààbûngì, bu muntu ne muntu paa nkaayende, kadi anu bwònsò bwabo pamwe ki bavwa mukajende. Bu mudibi ne Mubidi wònsò nkòòng wa beena kwitabuujja ki udi Mukaji-musela wa Kilisto, bwalu Wòwò awu ki Yêyè, mukaji. Yêyè ki uvwa Mulume. Mpindyewu, twètù ki baakenjiibwa bwa Kilisto. Kî n’Kilisto wâkenjiibwa bwetu twètù to.

138 Ki citudi tuteeta kwenza leelu ewu mu mikanda yetu ya dilongeshangana naayi, mbwa kuteeta kwenza bwa Dîyì (didi diikale Kilisto adi) dikumbanangane neetu twètù, pamutu paa kuteeta kwenza bwa twètù biine kukumbanangana ne Dîyì. Ki dishiilangana ndyòdì adi.

139 Padi muntu usungula nsongaakaji kampanda wa mu famiye kampanda, kèna ne cya kweyemena bulenga bwa kwìsù to, bwalu bulenga bwa kwìsù butu budingangana. Ne bulenga bwa

kwîsù bwine abu, bulenga bwa kwîsù bwa cyena leelu bwa pa buloba ebu abu, s'mbwa dyabulu.

“Kaa,” mûndì ngumvwa muntu kampanda wamba kunudi aku ne, “wadimuka bwa apu’s, muyiishi!”

¹⁴⁰ Ndi ngamba ne bintu bidi pa buloba ebu ebi, bidibo babiikila ne mbilenga ebi, kakuyi mpatà to mbya dyabulu. Nènnùjaadikilèci. Nenku, mu bukênkè bwa cingãmbi eci, tukenketaayi mu Dîyì dya cijila dya Nzambi, bwa kumona ne ncyà bushuwa anyi kî ncyà bushuwa. Ne bamwe baa kunudi nwênù bakaji mbaswe kwikala balenga kwîsù bikole! Monaayi kudi bwòbò abu bufumina. Ku cibangidilu, tudi tusangana ne Sataana uvwa mulenga wa dikema mu mushindu wa ne wakaseeswisha Banjelo. Ne yêyè mwine ki uvwa Mwanjelo mutambe kulengela kubapita bônso. Bileeja ne, budi busanganyibwa mu dyabulu. Nsumwinu mmyambe, Solomo mmwambe ne: “Bulenga bwa kwîsù budi cyanaana.” Ncyà bushuwa. Mpeekatu’s mmulenga kumona. Cya bushuwa, mmulenga kumona. Udi ukokangana ntema.

¹⁴¹ Ndi muswe kunukonkaku, ne kunwambilaku cintu kampanda kaaba aka. Ndi muswe bwa nwênù kumona, mu tusunsa tukese. Ku mishindu yônso ya bintu pa buloba, nyuunyi, nyama, tudi tusangana ne mu mwoyi wa bukwanyama, yônso pa kuumusha wa muntu, mulume ngudi mulenga, kî mmukaji to. Bwa cinyi nanku? Tangilaayi ku... Tangilaayi kashà, kashà kanene kaa mpàngà ka—kalenga ne nsengu yaku aku, ne kaakashà kakese kaa kakaji kaa kakayi nsengu aku. Tangilaayi ci—cikuka cya nzoolo, kaamukumbu kakese, kaa matobamatoba aku, ne citaala cinene cya masala malenga aci. Tangilaayi nyuunyi mulume ne nyuunyi mukaji. Tangilaayi cyôkosò cilume ne cikaji. Nwamonu anyi? Nenku kakwenaku mushindu wa bukwabintu nansha umwepele pa buloba apa, udi mwenjiibwe, udi mwa kuseeswisha ne kwikala ne nsômbelu wa ciipanshi bu mudi mukaji wa muntu to.

¹⁴² Mpindyewu, mwaneetu wa bakaji, kujuuku wapàtuka pambelu to. Indila anu too ne patuumvwa ndekeelu wa Cyôci eci. Nwamonu anyi? Nwamonu anyi?

¹⁴³ Kakwenaku cintu nansha cimwe, kakwenaku cintu cikaji nansha cimwe pa kuumusha mukaji wa muntu, cidi cifwanyine kwikala cyena masandi to. Nutu biinyike kabwa ne “nkeena masandi,” nutu biinyike ngulube ne “ci—cingèndààmàsàndi,” kadi, mu maalu a nsômbelu, yôyi ayi yitu ne nsômbelu mulenga kupita cyabibidi cimwe cya bakajaana badi bende luumu baa mu sèndèmâ badi pambelu apa aba. Yôyi kayeenaku mwa kwikala cingà cintu to anu ya nsômbelu mulenga.

¹⁴⁴ Nenku mukaji wa muntu ki wâkashintuludiibwa, bwa dikudimika. Ncyà bushuwa. Nudi numona kùdì bulenga bwa kwîsù buya kamufikisha anyi? Mpindyewu, ki bwa cinyi, leelu

ewu, tudi tusangana ne bakaji bakaadi mu divudijangana dya bulenga bwa kwîsù. Angataayi Pearl Bryan, nukaadiku bamone fôtô wende anyi? Yêyè ki uvwa ne cya kwikala bulenga bunene mene bwa kwîsù bwa Amerike. Kakwenaku mwânà mulongi wa mu cilongelu kana cyônsò eci udi kayi mufwanyine kumushiya wa—wa cinu to. Nutu bamanyeku ne bidi ne cya kwikala mushindu awu anyi? Nutuku bamanye ne Bible mmwambe ne mushindu awu ki wikalabi anyi?

145 Nutuku bamanye ne cibula cyakavwila kudi bakaji ku cibangidilu anyi? Nenku cibula... Ku ndekeelu ne bikajike mushindu umweumwe awu, bakaji bangata bukookeshi ne biikale bakookesha balume, ne bikwabo. Nutuku bamanye ne Mifundu yidi yamba nanku anyi? [Disangisha didi dyamba ne: “Amen.”—Muf.] Nudi bamanye, dituku dyavwalaye bilàmbà bya muntu mulume, ne dyabebulaye nsuki yende, bintu byônsò abi mbibengangane ne Diyî dya Nzambi. Nenku nutu bamanye ne yêyè udi uleeja ekeleeziya anyi? [“Eyowa.”] Panwatangila bidi bakaji benza, nenumanye cidî ekeleeziya wenza. Aci ncyá bushuwa menemene. Mpindyewu, mpindyewu, aci ncilelela menemene anu mudi Diyî dya Nzambi diikale dilelela amu.

146 Cintu cikaji cikwabo nansha cimwe citù cyenjiibwe kacitu mwa kudishiya ne nsômbelu wa ciipanshi bu mudi mukaji wa muntu to. Kadi paabi, ku cyôci aci, mwikale mwenjiibwe cintu cyangata ku cikwab- . . .

147 Yêyè kavwa mu bufuki bwa ku cibangidilu to. Bintu bikaji bikwabo byônsò bidi mu bufuki bwa ku cibangidilu: nyuunyi, mulume ne mukaji; nyama, mulume ne mukaji. Kadi, mu mwoyi wa buntu, Nzambi wakenza anu muntu mulume nkaayende, ki kupatulaYe ku yêyè awu. Nenku mukaji ncintu cyangata ku mulume, bwalu Nzambi kaakabwejaku cintu bu nanku to. Kenketaayi mu Mifundu. Cya bushuwa menemene. Nzambi, to, mukalenge, mu bufuki Bwende bwa ku cibangidilu. Mukaji wakateekiibwa anu mwaba awu.

148 Kadi bu yêyè mwa kudilama mu mushindu mujaalame, difutu kaayipu's we dyapetaye dinene kupita dya mulume. Yêyè's mmuteekiibwe mu cyalu cya diteeciibwa. Ku yêyè nkudi lufu luvwile. Yêyè ngudi mupiile bwa lufu lwônsò elu. Kadi Nzambi kukudimuka e kukwata mudimu ne mukwabo mukaji bwa kupingaja Mwoyi; kutwadila Mwan'Ende ku mukaji, mukaji wa butumike. Kadi mukaji mubi ki cintu ci—citambe bubi cidiku; kakwenaku cintu nansha cimwe cidî mwa kwikala cya ciipanshi bu nanku nansha.

149 Kaayina, mwânà wa Sataana, wakadyelela meeji ne Nzambi uvwa witaba bulenga bwa kwîsù. Ki mùdiye wèla meeji leelu ewu. Kaayina uvwa mwânà wa Sataana. “Kaa, mpindyewu!” mùdi wamba. Katwakubwela mu disunsula pa bwalu abu to, kadi anji ndekelaayi nnujikijile mpatà pa bwalu abu. Bible

ngudi mwambe ne yêyê “uvwa wa mubi awu.” Pa nanku, aci’s ncikose bwalu. Eyo. Mpindyewu, yêyê uvwa mwânà wa Sataana. Ne yêyê wakadyelela meeji ne, kutwala kwa cyoshelu kadi kucivwija cilenga cya menemene bwa dikuukwila, ki civwa Nzambi mufwanyine kuneemeka.

¹⁵⁰ Badi badyelela meeji, badyelela meeji amweamwe awu leelu ewu. Cya bushuwa. Cya ne: “Tudi twibaka citanda cinene. Netwikale ne mangumba manene. Netwibake citanda citambe bunene ne bantu baa mvwadilu mutambe bulenga, balombodi baa ekeleeziya batambe kulonga tulaasa.” Misangu mikwabo Nzambi utu ku ntanta wa miliyô dikumi ya kilomeeta ne ciine aci. Ncya bushuwa. Kadi pende, s’ng’ekeleeziya’s.

¹⁵¹ Pa nanku, piikalabi ne Nzambi utu uneemeka anu dikuukwila, meeji matooke, didifila, Kaayina’s uvwa mwakane anu muvwa Abele amu. Kadi ku dibuulula, nkwakuumvwaye ne, kacivwa mbimuma bya pommès byakadyabo kudi baledi bende to.

¹⁵² Nêngãmbè cintu mwab’ewu cidi kacyi cimweka cîmpè to bwa mwambi, kadi nêncyãmbè, nansha bishi. Ntu ngumvwa bakwabo aba bamba bintu, nenku biikale bamba tuubilele tukese. Kî ncîndî mêmè ne meeji a kwamba to. Nansha nanku, cîmvwà ngamba ncyôci eci: “Piikalabi ne didya dya bimuma bya pommès ndyâkafikishà bakaji ku dimanya ne bavwa butaka, s’bidi bikengela bwa twètù kubapa cyakabidi bimuma bya pommès.” Nwamonu anyi? Nwamonu anyi? Uhuh. Numfwilaayiku luse bwa cyôci aci, kadi anu bwa kushintulukaku’s. Ngânûswiki mwab’ewu, ngaakula anu bwa bakaji, ne bikwabo. Ndi—ndi—ndi muswe kunwikishishaku ndambu, bwa cidi cilonda eci. Mpindyewu, monaayi, nwênù. . . Kacivwa bimuma bya pommès to. Tudi bamanye aci.

¹⁵³ Ekeleeziya ukaadi mufike mu matuku aa, ne bintu bikaadiye mwenze ebi, anu mudi bintu byônsò bikwabo byenza kudi muntu ebi, wenda ushaala wa maalu a mamanya. Badi munkaci mwa kuteeta kwenza ekeleeziya wa maalu a mamanya, ku dikokangana dya ntema ne bimfwanyi ne tuleyi tunene. Ne cyavu kutonda ncyà ne beena Mpenta baabwedi paabo mu biibidilu anu bimwebimwe abi. S’mbipiciibwe ne nwênù baye ne ngoma, kwînshi eku mu disangu mwamwa, ne Nyuma wa Nzambi mununyungulukile. Kadi nudi nukeba kudifwanyikija ne bakwabo baabo, bwalu nukaadi badivwije dingumba. Ki cidi cyenze bwalu abu ncyôci aci. Nwamonu anyi? Ekeleeziya yidi yikeba kulwa ya maalu a mamanya.

¹⁵⁴ Kadi nwavulukaayi ne, pàdi anu muntu wenda upetela ditanta ku maalu a mamanya, ùdi wènda udishipa yêyê mwine dituku dyônsò. Paakenzaye kapyà kaa cingoma, tangilaayi cyakenzaku. Paakenzaye mashinyi a kadyendelandela, ôwò awu’s adi ashipangana kupita ne kapyà kaa cingoma kiine.

Mpindyewu ùkaadi mudipetele bombe bwa mushinda. Ndi ndikonka cyenzaye ne ciine aci's? Cya bushuwa.

¹⁵⁵ Bya mwomumwe kabidi ne ekeleeziya, padiye ukeba bwa kwenza bintu ku maalu a mamanya, ku màyelè makwatakaja kudi muntu, udi utàmba kunusaka kule ne Nzambi, ne unubweja mu lufu, kupita muvwabi ku ntwadijilu. Aci ncyà bushuwa. Kusungulu ekeleeziya webe mu mushindu umweumwe uwakasungula mukajeebe awu to. Nwamonu anyi? Cidi maalu a mamanya menzele mukaji civwa cikemesha be, kadi bidi bikengela bwa wêwè kuseemena kule ne ekeleeziya webe pa ciine aci; muntu ukaadi mwenze bilaabu bya kwîsù, mpuutùlù, ne bintu bikwabo byònsò ebi. Sungwila ku ngiikadilu wa Dîyi Dyende.

¹⁵⁶ Mpindyewu tufwanyikijaayi mukaji-musela wa mu mubidi wa leelu ne udi udyamba ne ng'ekeleeziya mukaji-musela wa leelu ewu. Kufwanyikija mukaji, wa bwena udi udilongolola bwa kubwela mu dibaka leelu ewu ewu.

¹⁵⁷ Mpindyewu, anji tangilaayi anu cidi maalu a mamanya mamwenzele. Ùdi wànji kupatuka, cyakumpala, ne nsuki yende mikosa, ne yimwe ya ku mishindu ya dilongolola dya nsuki ya Jacqueline Kennedy eyi, nwamonu's, anyi cintu cya mushindu awu. Kadi nudi bamanye cidi Bible wamba anyi? Mu bushuwa bwa bwalu Bible udi upa mulume, piikalaye muswe, bukenji bwa kumwipata ne kushipa nende dibaka, yêyè mwenze nanku. "Mmukaji wa difwisha bundu, wakosa nsuki yende awu." Bible ngudi mwambe nanku. Cya bushuwa. Kanuvwaku bamanye nanku anyi? Huh? Kaa, eyowa! Ntu ntamba kuyiisha mu Californie mu mushindu wa kanuyi mwa kupanga kumanya aci to. Ncyà bushuwa. Kaa, eyowa! Cidi ne dikwacisha kaayi kùndi? Bòbò badi anu bacyenza, nansha bishi. Kwèna mwa kwangata ngulube e kumushintulula dînà, kumwinyika ne mmwànà wa mukooko to. Monaayi.

¹⁵⁸ Nenunkine paanyima paa cyôci eci, kadi nenumanye Bulelela. Nwamonu anyi?

¹⁵⁹ Tangilaayi. Tucifwanyikijaayi. Ki yêyè ulwàlwa ewu ne bilaabu bya kwîsù búngi cyanaana, cintu cidiye kayi to, mukaji musela wa cyena leelu. Umwoweshe anu màyi kwîsù aku, mulume's mmufwanyine kumunyeema, pàmwäpa. Nebikwenze bwôwà bwa mufwanyine kufwa, bu wêwè mwa kuumusha anu bintakanyi byònsò abi kwîsù kwende aku. Ki mudibi kabidi bwa ekeleeziya udi ne kumpala kunene, kulaaba mukubu, Max Factor wa teoloji anu pa yêyè. Uh-huh. Bubidi bwabo badi ne mpala mu—mulenga, wa mafi, bulenga bwa kwîsù bukwatakaja kudi muntu ne kabuyi bulenga bwenza kudi Nzambi to. Kamuyi ngiikadilu wabûngi mu bônso babidi to.

¹⁶⁰ Monaayi, anu bu Sataana menemene, bukumbane bwa kuseeswishangana naabu, fwanyikijaayi mpindyewu mukaji-

musela wa cyena leelu ewu ne yêyê awu: ùvwàla tuputulu, ùdilaaba bilaabu bya kwîsù, ùkòsa nsuki yende, ùvwàla bilàmbà bidi byenza ne yêyê ikale mufwanangane ne bantu balume, ne mwikale uteeleja mpaasata udi mumwambile ne abi mbîmpè awu. Yêyê awu's mmuseeswishanganyi. Neakenge bwa cyôci aci mu myaba ya dyamwamwa yaya. Aci's ncyá bushuwa. Mukaji awu wenza ciine aci bwa kuseeswishangana, bwa kwikalaye cintu kampanda cidiye kayi to.

¹⁶¹ Mushindu awu ki udi ekeleeziya wenza, ùpeta mapolome manene a DD., Ph.D., LL.D. Pa nanku wêwè udi wamba ne: “Wetu mpaasata udi *cikampanda*, *cikansanga*, ne *cikankenga*,” pàmwápa kayi mumanye Nzambi kupita nudi Hottentot mumanye mwanu wa beena Ejipitu wa mafuku cinunu ne bumwe to. Ncyá bushuwa. Cya bushuwa. Dilabula kampanda dya seminere wa teoloji dipatuka naadi mwómò amu, kadi kayiku mumanye Nzambi kupita ní ncinyi ní ncinyi nansha.

¹⁶² Ekeleeziya wa cyena leelu ne bilaabu byabo bya teoloji abi, hmm, bakaadi bafikishe bakaji baabo ku dikungula butumbi bwabo bwònsò, kudi ka-ricky kaabo kampanda ne kampaasata kadibo naaku aku, kenze bu ka-Izabela bu byôbì ne kavwaku. Nsuki mibebula, tuputulu, bilaabu bya kwîsù, byònsò bilongolola mu dilabula dya mushindu wa teoloji, ki mushindu awu udi ekeleeziya mwimane. Cya bushuwa. Kadi wende ngiikadilu wa nyuma udi kule ne kwikala mukaji wa nzubu wíkala Yesu Kilisto ne cya kulwa kwangata awu.

¹⁶³ Mwena Kilisto nansha wa bishi bu yêyê mwa kusela mukaji wa mushindu awu, cidi cileeja ne ùkaadi mupangile ngâsâ. Dilabula dyende dya Nzambi ne dilabula dyende dya dikù, bwa cidi cikengela dikù kwikaladi, didi kule, padiye usungula mukaji bu nanku. To, mukalenge. Mukaji awu kí mmufwanyine kukumbanangana ne dilabula dya mwena Kilisto to. Ngiikadilu wende wa nyuma udi kwinshi kutambe, mufwe, mu bulenga bwa kwîsù bwa cyena mangumba ne lukuka lwa pa buloba.

¹⁶⁴ Mwaba awu menemene ki udi ekeleeziya mwimane leelu ewu, mwangate ngiikadilu wende mumupa kudi Dìyì kadi kumumbisha Sataana, ku ntendeleelu mukwatakaja kudi muntu. Paabi, yêyê's uvwa ne bukenji, bu ekeleeziya wa Nzambi, bwa kushaala ne Dìyì dya Nzambi ne kwikala ne Nyuma Mwîmpè ukwata mudimu munkaci mwabo, mwikale ulamakaja pamwe Mubidi ne Dìyì ne dinanga dya Nzambi. Pamutu paa cyôci aci, yêyê ukaadi musumbishe bwanaabute bwende, bu Esawu, kadi kwangata dingumba, òmulekela ucyenza, cyònsò naka civwaye muswe kwenza aci, cya bushuwa, anu bwa ne ikale mumanyike mwakenza mamwëndè ku Nicée, Loomo. Dìyì dya Nzambi!

¹⁶⁵ Kaa, mushindu mwine ukaadici cibwele mu cipaapu cyetu cya beena Mpenta's we! Byavu kutonda be, kadi cikaadi cibwele's.

¹⁶⁶ Monaayi, katanci kakese cyanaana, mánseelè mu ekeleeziya wa Katolike. Mukaji awu, bwa kushaalye mánseelè, ne bwa kuvwalaye cibwikilu cya ku mutu cya ndekeelu aci, kakuyi mpatà to yêyè mmudisumbishe kudi ekeleeziya awu. Ūkaadi (musuuka, mubidi, ne nyuma) cintu cya bende cya ekeleeziya awu. Kàcyèna ne meeji ende yêyè mwine kabidi to. Kèna mwa kwikala naawu to, padiye uvwala cibwikilu cya ku mutu cya ndekeelu aci, kacyi ne meeji ende yêyè mwine to, anyi ne diswa dyende yêyè mwine nansha dikese. Monaayi pambelu apa ne, Sataana udi ubavwija cintu cyende cya mashimi aci, cifwanangane ne cilelela.

¹⁶⁷ Ekeleeziya mulelela wa Kilisto, Mukaji-musela, ukaadi pende mudisumbishe kudiYe ne kudi Dîyì Dyende dilaya, mu mushindu wa ne meeji mene adi munda mwa Kilisto adi munda mwebe wêwè. Dishilangana kaayipu's we!

¹⁶⁸ Kadi tudi tusangana leelu ewu, ne, ekeleeziya wa cyena leelu, ekeleeziya wa pa buloba wa cyena leelu, ekeleeziya wa pa buloba wa cyena leelu awu kabidi ne Ekeleeziya wa nyuma mmiimicisha yònsò yibidi, bwa kulelayi bânà baa balume.

¹⁶⁹ Umwe wa kudibo, dilediibwa dya cyena mangumba, ki diikalà mwa kwenzeka, dimwe dya . . . dituku, ku . . . matuku aa, ku Nsangilu wa Maeeleeziya wa Buloba bujima, wikala mwa kulelela baa pa buloba mufwilakanyi ne Kilisto, kupicila ku dingumba. Aci ki Bulelela bwa menemene. Bidi mwa kwenzeka ne nciikadi ne mwoyi ntanta mukumbane bwa kucimona to. Ndi ngiitabuuya ne nêncimònè. Kadi, nwênù bansonga, nuvulukaayi ne nutu bumvwe mwambi kampana wamba cyôci aci. Aci ndekeelu wa byònsò ki kwikalaci mwa kafikila. Nenku ki cimanyinu cya nyama wa lwonji ncyôci aci, penzaye Nsangilu wa Maeeleeziya wa Buloba bujima awu. Nenku yêyè nealele wende mwânà wa balume awu, mufwilakanyi ne Kilisto.

¹⁷⁰ Mukwabo mmwimicisha kudi Dîyì dya Nzambi ne nealele Mubidi, Mubidi mujikija wa Yesu Kilisto, udi mwikale Mukaji-musela. Mubidi wa Kilisto kî mmwanji kujika to. Mbanganyi badi bamanye aci? Mulume ne mukaji badi umwe. Ne Kilisto udi Mubidi umwe, Dîyì. Nebikengele bwa Mukaji-musela ikale citupa cikwabo cya Mubidi awu. Nenku bibidi abi, pamwe, ki bidi byenza kabidi Mubidi umwepele awu. Mushindu uvwa Adama ku cibangidilu: mulume, mukajende, badi umwe. Mpindyewu, Yêyè, Mukaji-musela mulelela awu, mudisumbishe anu menemene kudiYe, mu mushindu wa Yêyè kayi ukwata mudimu ne meeji ende Yêyè mwine to. Meeji Ende, mu bushuwa bwa bwalu, ndiswa Dyende, ne diswa Dyende n'Dîyì Dyende.

¹⁷¹ Mpindyewu tangilaayaaku udi udyamba ne mmukaji-musela udi musungula kudi bantu ewu, ne fwanyikijaayi wa mubidi ne wa nyuma wa leelu ewu ewu, Izabela wa cyena leelu mulowa kudi Aakaba wende, malenga a kwisù a Max Factor, bintu byònsò.

Tangilaayi ekeleeziya, mushindu umweumwe awu, kadi mwikale ndumba bwa Dìyì dya Nzambi udi ne mwoyi; mangumba manene, bitanda binene, mantamfu a mfranga manene, difutu dinene, mudisumbishe yèyè yònsò. Bantu biimane mu cyambilu bamba patooke mudibo biitabe ne cyôci aci cidi anu cilenga, kadi kubalekela bacyenza kabayi banyookiibwa. Diseeswishangana anu pa dyôdi menemene, kwajiki. Cikondo cya Ekeleeziya wa Laodikiya mpofo bulelela, anu menemene cidi Bible mwambe ne ki ciikalàku. “Udi mwambe ne: ‘Ndi mubanji. Ndi musômbe bu mukalenge-mukaji. Ncyêna nkengela cintu.’ Kadi kuyi mumanye ne udi mupele, mwena dikenga, mpofo, mukengeledi wa luse, butaka: kadi kuyi mucimanye to.” Aci cyôci kaciya EMU MMUDI MUKALENGE WAMBA to, Bwakabuulwibwa 3, ncutuku mwanji kuCibala to. Cyôci aci ki cidiye, kadi kayi mucimanye to! Anji elaayibi meeji pa bwalu abu.

¹⁷² Bu wêwè mwa kwambila mulume anyi mukaji, mu mùsèsèsù, mwikale butaka bwa pulupulu ebu, umwambila mudiye butaka, kadi yèyè wamba ne: “Endela yebe,” mona’s, s’nkupangike cintu mwaba kampanda mu mutu mwende amu. Kudi cintu kampanda cipampalamuke mu mutu mwende amu.

¹⁷³ Kadi paudi mwa kubala Dìyì dya Nzambi, mushindu uvwa bantu ne cya kwenza, ne dibatiiza dya Nyuma Mwimpè ditudi naadi leelu ewu edi, kadi, bantu, mona’s, bakutangila bu ne wêwè udi mupâle. Wêwè ubambila ne: “Nudi ne. . .” Bikengela balediibwe cyakabidi. Bikengela biitabuuje Bible.

¹⁷⁴ Bôbò bamba ne: “Aci civwa mmwanu wa beena Yuda, wa kukaadi bidimu. Wetu ekeleeziya ngudi ne njila.” Mukengeledi wa luse, mwena dikenga, mpofo, butaka, kayi nansha mucimanye to. Cidi. . .Ne Bible mmwambe ne mu ngiikadilu awu ki mwabwelabo.

Mmunyi mudi muprofeta mulelela mufwanyineku kupanga kucimona? Ncyêna mumanye to.

¹⁷⁵ Cidi munkaci mwa kubwela biteketebiteketete mu ekeleeziya yetu yònsò eyi, myaba yònsò. Nwânji nucitangilaayi, anu mu mmwenenu wa cyena leelu menemene. “Ndumba wa kale ne bânà bende baa bakaji,” wa mu Bwakabuulwibwa 17 awu, mwikale upa bantu “bapele, bampofo, beena dikenga” abu dilongesha dyende dya teoloji didi dibengangana ne Dìyì dya Nzambi adi. “Ne baakasangana munda mwende misuuka ya bapika, ne balume ne bakaji baa—baa myaba yònsò.” Pamutu paa kukoka ntema ya bantu. . .

¹⁷⁶ Kilisto utu bulelela ushindika Dìyì Dyende, cidi cikoka ntema ya bantu. Yèyè kêna ukoka ntema ya bantu ku ekeleeziya yidi mikokiibwe kudi mangumba manene ne byenzedi binene, ne nkutukutu minene ne bintu bidi bituuta ku mèsù abi to. Kadi Dìyì dya Nzambi ki didi dikoka ntema ya Mukaji-musela wa Kilisto.

177 Mpindyewu monaayi. Bidi bikoka ntema bwa—bwa kumona mushindu udi—udi ekeleeziya uteeta kukoka ntema ya bantu ku mizabi milengele ne mudi beena korale bavwale, ne bakaji badi babebule nsuki ne kwisù kulaaba bilaabu. Nenku badi badyelela meeji ne . . . Mwine awu wimba bu Mwanjelo. Ushima bu dyabulu, unyeemakana eku ne eku ku dija dya maja bu, kayiku ne cidiye wela meeji pa bwalu abu to. Nenku ki cidibo bôbò beelela meeji: “S’mbîmpè. S’mbilenga be.” Kadi, nudi numona’s, mbyenza bya mafi. Kî n’Diyi dya Nzambi to.

178 Padibi ne, Mukaji musela mulelela udi ukoka ntema ya Nzambi, mu kulama kwa Diyî Dyende. Mpindyewu monaayi. Mpindyewu tumonaayi Kilisto.

179 Wêwè udi wamba ne: “Ee, mpindyewu, anji indila kakese, bulenga bûdi wêwè wamba ebu budi bishi?”

180 Bible mmwambe, mu Yeshaayi 53.2, paakalwa Yesu, ne: “Kakuvwa bulenga kudiYe, butuvwaku bafwanyine kuMujinga to.” Ncya bushuwa anyi? [Disangisha didi dyamba ne: “Amen.”—Muf.] Kakwena bulenga nansha. Bu Yêyè mulwe mu bulenga bwa pa buloba, mudi Sataana mulwe yêyè leelu ewu emu, nunku bantu’s mbaye lubilu bakaMunyungulukile ne baMwitabe mushindu udibo biitaba ekeleeziya leelu ewu ewu. Nunku mbaMwitabuuje, baMwakidile, mudibo biitabuuja Sataana leelu ewu emu. Cya bushuwa, nunku mbenze nanku. Kadi Yêyè kaakalwa mu bulenga bwa mushindu awu to, kadi utu Yêyè ulwa anu mu bulenga bwa ngiikadilu. Kwôkò aku, Kilisto kavwa Muntu mulenga kwisù, munene, wa dikanda, wa mukici to. Nzambi katu usungula awu mushindu to.

181 Ndi mvuluka musangu kampanda wàkayà muprofeta bwa—bwa kwangata mfumu, bwa kuvwija mwânà wa Isaayi mfumu, bwa kwangataye kaaba kaa mfumu mukwabo, Shawula. Ki Isaayi kumupatwilaye, mwanende wa balume muleemule, munene, mulenga. Kwambaye ne: “Cifulu cya butumbi’s necimweke bilenga be, pa wende mutu wawa.”

182 Muprofeta kuyaye bwa kumupongolwela maanyi. Yêyè ne: “Nzambi wamubengi.” Ki Yêyè kubenga umwe ne umwe wa kudibo, too ne mwakafikaye ku kalumyana kavwa kakese, kaa kale kaa tukaaya tukobame, kaa mubidi mumweke mukunzubile. Ki kumupongolwelaye maanyi, ne kwambaye ne: “Nzambi wamusungulu yêyè.” Nwamonu anyi? Twêtù tutu tusungula ku mèsù. Nzambi utu usungula ku ngiikadilu.

183 Ngiiikadilu, kakuvwaku ngiikadilu bu Yesu Kilisto to. Ûdi ùsòmbela munda mwebe ne uMumwenesha. Tudi tumona ne ncya bushuwa. Ki mbulenga bwa pa buloba budi bukoka ntema ya Mukaji-musela Wende to. Nngiikadilu Wende, ngiikadilu wa Ekeleeziya, ki udi Yesu ukeba; kî mmwaba udi bitanda bya binene, mwaba udi mangumba manene, mwaba udi buumambala bunene to. Yêyè mmulaye bwa kusangila mwaba

wònsò udi babidi anyi basatu badisangishe. Cya bushuwa. Mpòpò apu padi mwena kwitabuuja mulelela uteekela dyende ditekemena, mpa Dìyì dya Nzambi adi diikale dishindika mu Bulelela, ki cidì ne bwalu. Sungula ku Dìyì Dyende, kî ncisumbu cya cinange maalu a pa buloba to. Bòbò mbakine aci.

¹⁸⁴ Kabyena bikemesha to bwa padiye mwipaciibwe kudiYe mu dibaka, bwalu mmupangile dibuulula Dyende, ne yèyè mwine kèna naadi to. Yèyè kèna ùmucyùka to, mushindu udiye wenza maalu ne wenza bintu, ne búngì bwine bwa maalu a pa buloba adiye naawu aa.

¹⁸⁵ Yèyè udi wenda ukebangana ne ngiikadilu wende, ngiikadilu wa Kilisto. Mpindyewu, anu katanci kakese cyanaana mpindyewu. Ki cyòci aci. Ùdi ùsungula Mukaji-musela bwa kuleejaye ngiikadilu Wende Yèyè, kudi ekeleeziya ya cyena leelu ya leelu eyi mipangile ndongamu Wende—Wendè mwaba ewu, mu ntanta wa mùliyò ne binunu nkama yisambombo bya kilomeeta, bwalu badi bavila *Eci* bamba ne kî m'Bulelela. Pa nanku ncifwanyine kwikala bishi? Mpindyewu, Yèyè udi munkaci mwa kukeba dituku diikalà Mukaji-musela ne cya kwenjiibwa, Ebelu 13.8, anu menemene muvwaYe, muvwaYe Yèyè amu. Bidi bikengela cìikalè mubidi Wende umweumwe awu, mifuba yimweimwe ayi, Nyuma umwèumwè awu, bintu byònsò bimwebimwe abi, biibakiibwe anu menemene, nenku babidi abu bashaala umwe pa dîbà adi. Pacidi anu ekeleeziya kayi mwanji kushaala aci to, kabeena umwe to. Ngiikadilu Wende Yèyè, Dìyì, bwa cikondo eci, udi ne cya kufwimbiibwa. Mukaji-musela udi ne cya kwikala mufwimbiibwe bu mudiYe.

¹⁸⁶ Mpindyewu, bwa kujikija, ndi muswe kwamba kabingila kândi mwambidile maalu aa, nenku nê—nênjikijè. Bufuku bukwabo, lwà pa dîbà isatu wa dinda, mvwa mutabuluke.

¹⁸⁷ Ndi ndomba bwa muntu kana yònsò wa kunudi andamune eci. Kacya nkaadiku munwâmbile cintu kampanda mu Dînà dya Mukalenge citu kaciyi cya bushuwa anyi? Citu misangu yònsò anu cya bushuwa. [Disangisha didi dyamba ne: “Amen.”—Muf.] Ndi ngamba ngambilamu ne, Nzambi mmumanye ne ncilelela. Kakwena nansha cimwe, mwaba nansha umwe pa buloba, cya ku binunu bya bintu bikaadiku byambiibwe, cikaadiYe mwambe dîyì dya naka nansha dimwe dyaci to. Bitu misangu yònsò byenzeke anu patapata.

¹⁸⁸ Nansha mene pâmvwà mu Phoenix, dituku dikwabo, anyi kukaadi bu cidimu cijima nanku awu, pâmvwà munwâmbile Mukenji awu pa—pa *Tudi Dîbà Kaayì, Bakalenge?* Ki mèmè kunwambila ne: “Banjelo mwandamutekete nebatwilangane kuntu kwaka,” ne neciikale dikangula dya Bitampi ebi, ne bikwabo. Ki mwaba awu ci—cikandakanda cya *Life* kupatulaci kaabwalu kaa cyòci aci, Ludimi lunene lwa kapyà elu lwenda lùbànda mu mpeepele, mu butumbuke bwa kilomeeta makumi

anaayi ne mwandamukulu, bucyama bwa kilomeeta makumi asatu ne yisatu ne ndambu. Bôbò kwamba ne kabavwa mwa kuumvwa ne civwa ncinyi to; kî mbanji anu kumanya to. Kadi bantu badi basômbe mwab'ewu mu nzubu emu diloolo edi, bavwa biimane naanyi mwine mwaba awu pavwaci cyenzeke, anu menemene muvwa Ci cyambe. Yêyè ukaavwa mungambile ne bintu abi nebyenzeke, nenku mbyenzeke anu menemene mu byôbî. Mushindu udi cyônsò cya ku Bitampi abi cikanguke, ne cyambe maalu masokoka avwa masokokiibwe mu bikondo abi bya balongolodi ne bikwabo, anu patapata.

¹⁸⁹ Muvwabi ne, biimane pamutu paa kakuna, bantu, basatu anyi banaayi baa kudibo mbiimane apa mpindyewu mene, eyowa, bapite apu. Patuvwa twenda tubànda kakuna aku, Nyuma Mwîmpè kwambaye ne: “Angula dibwe dyadya.” Tuvwa tutwa buluwà. Yêyè ne: “Ûdyèlè muulu mu lupeepele, wambè ne: ‘EMU MMUDI MUKALENGE WAMBA.’” Mêmè kwenza nanku. Kuulu aku kufumaku kaamùlôngojî kakese kaa lupeepele. Mêmè kwamba ne: “Munda mwa mêmè makumi abidi ne anaayi, nenumone cyanza cya Nzambi.” Bantu badi basômbe mwab'ewu mpindyewu bavwapu.

¹⁹⁰ Dituku dyàkalondà, lwà pa dîbà dikumi nanku awu, mwimane mwaba awu, mêmè kwamba ne: “Dilongololaayi. Bwelaayi mwinshi mwa mashinyi mwamwa,” nkolomu's. Mêmè kwamba ne: “Cintu kampana cidi pabwîpî ne kwenzeka.” Kuulu kuvwa kutooke, anu lwà kuulu mu lupongo lunene. Kupwekaku Kapyà kenze mvunda kafumina mu Dyulu, ne Kôkò e kwelaku lubila lukole, kutuuta ku bimanu mushindu awu. Mêmè—mêmè mvwa mwimane menemene anu mwinshi mwa Kôkò aku. Mêmè kuumusha cifulu, kudikwata ku mutu. Kôkò kulwa mu ntanta bu wa centimètres makumi citeema anyi lukama ne makumi abidi kuulu kwanyî aku, ne kukosa mukidi munyungulukile cimanu aci mushindu awu, kadi kutuuta dikubakuba. Ki kwalukila muulu mu lupeepele, ne kwenza cyakabidi mvunda, ne kupweka, misangu yisatu, kukosa mene ne nsongo ya kiitwitu kaa mici ya meesikità, too ne mu ntanta wa mètres lukama ne makumi mwandamukulu. Nuumvu mudi balumyana abu bamba ne, “Amen” amu anyi? Bavwapu pavwaci cyenzeke, nwamonu's, ne cyenze makubakuba asatu.

¹⁹¹ Paakapatukabo mwinshi mwa mashinyi amu ne bikwabo, baalukila nunku, kwambabo ne: “Aci cididinge anu cikutuute, kakuvwa kufwanyine kushaala nansha katoba kaa difutà to.”

¹⁹² Mêmè kwamba ne: “Civwa—Civwa n'Yêyè. Ûvwa wakula naanyi.” Nzambi utu wakwila mu mvunda. Nwamonu anyi? Nenku's ki Dikunji dya Kapyà dimwedimwe dinudi numona mu fôtò adi, diimane mwaba awu.

Nenku pààkabàndàDi muulu, bôbò ne: “Ncinyi aci?”

Mêmè ne: “Dilumbulwisha didi dituuta Côte Ouest.”

193 Dituku diibîdi kuumukila apu, Alaska kwambaye kutùkina's. Nwamonu anyi? Dyôdi kutuuta musangu umwe, kwôkò aku, dikubakuba dya kumpala adi.

194 Bwalu's, bikengela wêwè kwenza cintu kampanda, bwa kucifwanyikija. Mùvwà muntu kampanda mwele mukele mu cyàsù, kadi kuwela mu mâyì, kadi kwamba ne: "EMU MMUDI MUKALENGÈ WAMBA, kwikalè mâyì matalale." Ne mukwabo pende, Yesu, kwangata mâyì e kuèla mu nyingu, ki—ki kuàvwija mvinyo.

195 Bikengela wêwè kwikala ne cintu kampanda, bwa kufwanyikija. Ki civwaci aci, civwa cibànde muulu mu lupeepele kadi kupweka aci. Ki civwa cibange kamvunda kakese aku. Munda mwa mēbà makumi abidi ne anaayi, Civwa cinyungishe mukuna awu mu mushindu wa cikose munkoloji mu nyungulukilu wawu.

196 Révérend Mukalenge Blair udi musòmbe apa ewu, ndi mumutangile buludi mpindyewu, ùvwa kuntwaku ne yéyè kwangula tumwe tupese twa cyôci aci, ne bikwabo. S'ki Terry Sothmann nyêyè ewu, bôbò abu, mwimane apa, ne Billy Paul. Ne bânà beetu, bamwe baa ku bakwabo bāàbūngì badi basòmbe apa aba, bavwapu bwa kucimona cyenzeka pavwaCi ciwupande apu.

197 Kî mbwalu bufwikakaja to. Mbulelela. Kacivwa cya kale cya mu matuku a Bible to. Aci mmpindyewu. Nwamonu anyi? [Disangisha didi dyamba ne: "Amen."—Muf.] Nzambi umwèumwè ukààdi misangu yônsò mundejeleeje bintu ebi awu, ne biikàle byenzekenzeke, anu mu byôbì menemene. Kabitu byanji kupangilaku musangu nansha umwe to. Bwa mpindyewu ùndi ntwa makumbu n'Yéyè.

198 Kukaadi mbingu ndambu, mvwa mu cikeena-kumona. Ne mvwa mwimane pa mwa—mwaba mutumbuke, ne bivwa bikengela bwa mēmè kubandila didyanjila-kumona dya Ekeleeziya. Ki mēmè kumona, ùfumina lwà ku luseke lwanyi lwa...Mvwa mwimane nangananga mu mushindu ewu, mutangile ku Wesete. Ki eku kufuminaku musumbà wa bakaji balenga kwisù, nkanzu milenga ya dikema, nsuki mile miswikila bîmpè menemene paanyima, maboko a nkanzu, ne jipè mipweke mu mushindu wa milongolola ne mankenda ônsò. Ne bavwa bônsò mu cikemu cya lwendu lwa mindoloooci, bu ne: "Ndaayi kumpala, masalaayi a Kilisto, nwenda bu bayaaya ku mvita, biikale ne nkuruse wa Yesu wenda uya kumpala." Nenku pavwabo bapita apu, mēmè mwimane, ne kuvwa Cintu kampanda mwaba awu, Nyuma kampanda, uvwa n'Nzambi, ki kwambaye ne: "Ki Mukaji-musela awu." Ki mēmè kutangila, nenku mwôyì wanyi kwikalawu ne disanka. Ki Yéyè kuya munyunguluke mu *nunku*, ne kunyungulukaye upicila paanyima paanyi.

¹⁹⁹ Paanyima paa katanci, paakaalukilaye mu *nunku*, KwambaCi ne: “Mpindyewu ekeleeziya wa cyena leelu ki wâlwa mu didyanjila-kumona.” Nenu ki ekeleeziya wa beena Asie udi upatuka ewu. Kacya nciwu mwanji kumonaku musumbà wa bukooya bu wawa to.

²⁰⁰ Ki ekeleeziya mikwabo yidi yipatuka eyi, ya matunga mashiileshiilangane. Yivwa ne mmwenekelu wa wenza bwôwà.

²⁰¹ Nenu ndi—ndi ngamba bwalu ebu bwalu ndi mwenzejiibwe bwa kwamba bulelela, kumpala kwa Nzambi. Kadi pãmbiYe anu ne: “Ki ekeleeziya wa Amerike ulwâlwa mpindyewu ewu, bwa kumubandila mu didyanjila-kumona,” bu ne nkaadiku mumone musumbà wa badémons, s’úvwa ngwôwò awu. Baba bakaji’s bavwa butaka anu bwa pulupulu ebu, ne kaacintu kaa kale kaa mmwenekelu wa mukunzubile, kenze bu kaa diikala dya ciseba cya nzevu’s. Nenu bavwa bakàkwàcile lwà kumpala kwabo aku, kakayiku ne cya kuulu to nansha cikese. Nenu bavwa benza cintu cya mushindu ewu, cidi, maja aa—aa adi bânà aba baja pambelu apa awu, dijekeja dya nyima adi ne bikwabo, ne mujiki wa mushindu awu mwikale wimba. Kadi pângàmònu anu Mandemwazele États-Unis upatuka anyi, mwoyi kadi kwamba kungiimana’s.

²⁰² Mpindyewu, eci ng’EMU MMUDI MUKALENGE WAMBA. Nwênù nwitabuuja ne mêmè ndi musadidi Wendè, nungitabuuje mpindyewu. Ncyênàku mufwanyine kwikala mwambe aci bwa cyanaana to nansha bya kumona lufu. Kakwenaku mfranga mikumbane pa buloba bujima apa bwa kumfikisha ku dyamba aci bu kaciyi cilelela to.

²⁰³ Nenu pààfikiyè pabwîpì, civwa ncintu cya mmwenekelu mutambe kwikala wa bukooya cya kacya. Mêmè kudyambidila ne: “Nzambi, mudimu mukole wònsò udi bayiishi ne twêtù bânà beetu batate bwa kuKupetela Mukaji-musela ewu, ki cidi citambe bulenga citudi bafwanyine kwenza cyacya.” Úvwa wenda ujekeja nyima, mukwacile *eci* kumpala kwende aku, cyenze bu umwe wa ku jipè eyi yitubo baja naayi maja a mu cifuka, mucikwacile lwà kumpala kwa bitupa byende abi aku, citupa cyende cya kwinshi aci, mushindu *ewu*, uja maja wenda ujekeja nyima mushindu utu bânà benza pambelu apa mu. . . mu manayi a ciipanshi atubo baleeja aa, bajeekeja nyima. Ki yèyè awu’s Mandemwazele Bwena Kilisto wa Amerike.

²⁰⁴ Ndi ngambilamu, ku dikwacisha dya Nzambi ne, ki mmwenekelu udici nende ku mèsù Kwende nyèyè awu. Ndi—ndi anu. . . Ndi mbanga. . . Mwoyi’s uvwa mufwanyine kwikala mungii mane. Mêmè kudyambidila ne: “Kuditacisha, ne kuyiisha, ne kuswisha kwònsò eku?” Yònsò wa kudibo mwikale ne nsuki mibebula, nenu bavwa benda bajeekeja nyima ne benza bintu bya lukutukutu, bakwacile *eci* lwà kumpala eku. Bóbò kusemena, mwaba wúmvwà mêmè nsanganyiibwa ne

Kampanda wa mutambe mfukilu ewu awu. Ncivwa mwa kuMumona to. Mvwa mwa kuMuumvwa wakula naanyi; uvwa anu pawwipi naanyi apu. Kadi mbenze anu babenda mu *nunku* ewu, bavwa bakwate *eci*. Biikale anu benda bajeekeja nyima ne baseka ne batungunuke, benza bintu bya lukutukutu mushindu awu, bakwacile *eci* lwa kumpala kwabo aku.

²⁰⁵ Mpindyewu, memè mwimane mu Bwikadi Bwende mwaba awu, mwikale musadidi Wende. “Nenku ku diditacisha dyanyi dyonsò dindi mwenze edi, ki cidi citambe bulenga cindi mufwanyine kwenza cyacya?” Memè kudyambidila ne: “Nzambi, bivwa ne dikwacisha kaayi kundi? Bivwa ne dikwacisha kaayi? Myadi yonsò eyi, ne disengelelangana, ne diswishangana, ne bimanyinu binene ne maalu a kukema ne bishima byudi Wèwè muleeje ebi. Ne mushindu mwine wumvwa memè ewu ngiimana mwaba wawa, ngaalukila kumbelu ne ndila myadi paanyima paa mumane kubayiisha ne bikwabo, bivwa ne dikwacisha kaayi kundi? Ne pashiishe bikengela ndeeje cintu bu nanku awu Bwebè Wèwè ne, ki Mukaji-musela nyawu?”

²⁰⁶ Nenku pamvwa mwimane mwaba awu apu, ntangila, ki kupitaye. Kadi nudi mwa kudifwanyikijila cya paanyima cyende, kaciyipu ne cintu to, mukwacile *eci* lwa kumpala kwende pavwaye wenda ukupa cifuka ne makaaya eku ne eku apu, mushindu awu, ku dijekeja dya nyima edi, wenza kubaala bibelu mushindu awu. Nenku, yèyè, kaa, civwa cya ciipanshi be, mushindu uvwaye wenza bintu bya lukutukutu, mubidi wende wenda uzakalala mushindu awu. Mpindyewu memè. . .

²⁰⁷ Wèwè udi wamba ne: “Cidi cyumvwija cinyi, Mwaneetu Branham?” Ncyèna mumanye to. Ndi nzwambila anu cyanaana cimvwa memè mumone.

²⁰⁸ Nenku mmwenze anu upita nanku, memè kumutangila. Kaa, mwoyi’s uvwa mwambe kungiimana cya bushuwa. Memè kukupa anu mutu kwa cyanaana. Memè kudyambidila ne: “Nzambi, s’ndi mupiishiibwe. Kabicyena—kabicyena bikengela bwa memè kuteeta kabidi mpindyewu to. Ebi’s mbipiciibwe ne mubilekele mwine.”

²⁰⁹ Mandamu Carl Williams, piikalabi ne udi musombe mwab’ewu, ne ciloota cyuvwa mungaawile aci, kukaadi cikondo, cyuvwa mumone bufuku kampanda aci, cidi anu cikutacisha aci, s’ki cyoci aci. Banguumushi yenda mu cyanza.

²¹⁰ Pashiishe, memè kudyambidila anu ne: “Mbipiciibwe ne memè—memè mucipwe mwoyi.” Mvwa mufwe’s.

²¹¹ Pashiishe, dyakamwe, memè kuCyumvwa cilwa cyakabidi. Ki *elu* luseke kulwaku Mukaji-musela umwèumwè uvwa munyunguluke muye *eku* awu. Ki nsongaakaji mitekete ayi yilwalwa cyakabidi eyi, ne yonsò wa kudibo mwikale muvwale mvwadilu wa ditunga dyende kuvwaye mufumine, bu mudi Suisse, Allemagne, ne bikwabo, yonsò wa kudibo mwikale

muvwale mvwadilu wa mushindu awu, bônso ne nsuki mile, anu menemene bu baa bwena baa ku ntwadijilu abu. Ki bôbò bàlwalwà aba, benda mindololooci. “Ndaayi kumpala, masalaayi a Kilisto, nwenda bu bayaaya ku mvita.” Nnku mbenze anu bapicila bônso pabwîpi ne cibumba cya didyanjila-kumona patuvwa biimanyine apu, dyakamwe, mèsù ònsò kutangilawu lwalwa luseke. Ki pashiishe kukudimukabo, ne kutungunukabo, benda mindololooci.

²¹² Nnku mbenze anu babanga bwa kubànda buludi kuya mu maulu, mukwabo ewu kubàndilayè ku mubangubangu wa kakuna kadi kupwekaye, mushindu *ewu*.

²¹³ Aba kubangabo benda bàbànda buludi babwela mu maulu. Kadi pavwabo benda mindololooci apu, mêmè kumona nsongaakaji mitekete yibidi lwà paanyima, bimweka bu ne yivwa mifwanyine kwikala nsongaakaji kampanda myenyi, bu ya mu Suède anyi ya mu Suisse nanku awu, anyi ya mwaba kampanda. Bôbò kubanga bakaadi bakenzakana, ki... Mêmè kwamba ne: “Kanwenji nanku to! Kanupatuku mu dikàsà adi to!” Nnku pâmvwà ngeela mbila mushindu awu apu, mêmè kwalukila mu mêmè, mu cikeena-kumona aci, mwimane mwaba awu ne cyanza cyanyi cyolola mushindu *ewu*. Mêmè kudyambidila ne: “Ee...”

²¹⁴ Ki bwa cinyi ndi mwambe cingãmbì eci, diloolo edi. Ndi muswe kunwelaku lukonko. Dîbà dikaadi diye kupita mutudi twètù twela meeji anyi? Yèyè awu mmufwanyine kwikala ukaadi mubiikidiibwe ne musungudiibwe, mutwibwe citampi kujikè anyi? Kakwakwikala nansha umwe wa pamutu to, nudi bamanye. Mbifwanyine kwenzeka anyi? Kaa, eyowa's. Kaa, eyowa's.

²¹⁵ Nwavulukaayi cîmvwà mwambe, dituku adi ku didya dya dinda. Mu bungungu bwa bilôngò bwa disangisha dya cilume ne cikaji, kudi bivuba mùliyò mujima ùdi ùpàtukà, mayi mùliyò mujima àdi àpàtukà. Kadi kudi anu cimwepele cya ku byòbì abi cidì cishaala ne mwoyi, ne, kadi paabi, byònsò bidi anu bifwanangane: cimwe pa mùliyò mujima. Cyònsò cya ku byòbì abi, diyi dimwedimwe adi ne civuba cya mushindu umweumwe awu. Cimwepele cya ku byòbì abi ncidi cishaala ne mwoyi. Bikwabo byònsò abi bidi bifwa.

²¹⁶ Muntu nansha umwe kèna mwa kwamba ne ndiyi kaayi didi dibobe, ne, kaa, bwalu bwadi budi cinyi to. Bikengela Nzambi angate adi dipangadika, dya ne neciikale mwànà wa balume anyi wa bakaji, wa nsuki mitòòkòlòke anyi wa nsuki mifiikuluke, anyi cyònsò ciikalàku aci. Nzambi ngudi wangata adi dipangadika. Kî ncyà kumpala cyapetangana naadi aci to, kadi cya kumpala cidì Nzambi mupangadike. Pâmwãpa cimwe cibànda *apa*, ne cimwe... Ne nukaadiku bamone, mu kalangi kaa disangishila bivuba ne diyi aku, bwa kumona mudibi bisangila. Mêmè nkaadi

mucitangile. Bikengela Nzambi angate adi dipangadika. Cimwe, cyônsò cya ku byôbi, bifwanangane anu menemene, kadi ku disungula's. Dilediibwa dya mu mubidi ditu nku disungula. Nzambi udi wangata umwepele pa mùliyô mujima.

²¹⁷ Pààkuumukà Izaleela mu Ejipitu, mu njila batangile ku buloba bulaya, bavwa bantu batwe ku miliyô yibidi. Muntu ne muntu wa kudibo uvwa mwinshi mwa mukooko wa mulambu umweumwe awu, cyanaana kabavwa mwa kwikala bashaale ne mwoyi to. Muntu ne muntu wa kudibo wakateeleja Mòsà, muprofete. Muntu ne muntu wa kudibo wakabatijibwa kudiye yèyè, mu Mbû Mukunze. Muntu ne muntu wa kudibo wakaja maja, bakaji pamwe ne Miliyama, bàbànda bapweka (pavwabo) ku mwelelu wa mbû, pààkabùtulà Nzambi mwena lukuna apu. Muntu ne muntu wa kudibo wakiimana ne Mòsà, ne wakamuumvwa wimba mu Nyuma. Bòbò, muntu ne muntu, baakadya manà a mu cipeela, àkalòkà mu Dyulu awu. Manà mapyamapya, diloolo dyônsò, cìdì cimfwanyi cya Mukenji aci, muntu ne muntu wa kudibo wàkàdya. Kadi, pa miliyô yibidi ayi, mbûngì kaayi bààkafikà? Babidi. Umwe pa mùliyô mujima.

²¹⁸ Kudi beena Kilisto batwe ku miliyô nkama yitaanu pa buloba diloolo edi, tubadilamù ne beena Katolike ne bônsò. Miliyô nkama yitaanu ya beena kwitabuuja baa ku dínà pa buloba. Bu Dyambwibwa mwa kwenzeka diloolo edi, aci ncifwanyine kuumvwija . . . piikalabi ne umwe pa mùliyô ki dibala dídì dyènjiibwa. Ncyèna ngamba ne ki dyòdì to. Kadi bu ne divwa ndyòdì, bantu nkama yitaanu, mu mèbà makumi abidi ne anaayi adi alonda aa, s'mbadi bafwanyine kupangika. Kanwena bafwanyineku nansha kuumvwa babwamba to. Nekupangike bantu bûngì abu, nansha bishi, biikala kabayi nansha mwa kubadiibwa to.

²¹⁹ Nenku mbifwanyine kwikala, kutwenzekela twètù, mulunda wanyi, mwakenzekabi pààkalwà Yone Mubatiiji. Nansha mene bayiidi baakamba ne: “Bwa cinyi Mifundu yidi yamba, bwa cinyi ba—bapostolo anyi baprofeta badi bamba, bwa cinyi mbambe ne Eliya udi ne cya kwanji kulwa dyambedi ne kwalujulula bintu byônsò?”

²²⁰ Yèyè ne: “Mémè ndi nzwambila ne Eliya ukaadi mumane kulwa, kadi kanuyi bacimanye to.”

²²¹ Dimwe dya ku adi panshi aa tudi bafwanyine kushaala basòmbè mwab'ewu ne: “Kadi bishi's bwa Dyambwibwa kumpala kwa dikenga dikole kudikumadi?”

“Dikaadi dimane kulwa kadi kanuyi bacimanye to.”

²²² Mubidi mujima, mutwa citampi munda, biikàle anu baWulame wenda mu dikàsà. Ncyèna ngamba ne bidi mushindu awu to. Ndi ntekemena ne kabyena mushindu awu to. Kadi, mulunda wanyi, paalekelaci . . .

223 Patwikala tuumvwaku cintu kampanda mu mwoyi wetu, diloolo edi, cya ne bikengela tulongole nsòmbelu yetu, ne bintu bitudi benze, lekelaayi nnudimwije, mêmè bu mwambi neenu. Ndi muswe kwamba bwalu ebu bwa musangu wanyi wa kumpala, mu cyambilu. Ndi mwalabale bikole, diloolo edi, pa *Eci*, kupita mûnkaadîku mwenze pa nî ncinyi cikwabo cyônso, nî ndîbâ kaayi, nî mmushindu kaayi, kumpala kwa bantu, bwalu ndi mupete budishikaminyi bunene mu masangisha aa. Panwikala nwitabuuja ne ndi muprofeta wa Nzambi, nuteeleje cîngânwâmbîdî aci. Piikalaku kaadîyî kakese kamwepele cyanaana kaudiku umvwa mu mwoyi webe amu, nda kudi Nzambi anu patudi twakulangana apa. Enza nanku.

224 Anji imanaayi kakese, nwênù balume. Tangilaayi twitabaayi yenu—yenu yinudi nukwacila mudimu ayi. Tangilaayi mu ekeleeziya yenu amu. Bidi menemene mudi Dîyi dya Nzambi anyi? Nudi bakumbaje mushîngà ne mushîngà wônso anyi? Wêwè udi wamba ne: “Mêmè ntu muntu mwîmpè.” Nansha Nikodeme pende’s ki muvwaye, ne bakwabo bônso’s ki muvwabo paabo. Bôbò abu’s—bôbò abu’s bavwa bîmpè maalû. Nwamonu anyi? Aci kacyenaku ne dipetangana naaCi to.

225 Nenku, nwênù bakaji, ndi muswe nutangile mu lumwenu, nutangile cidî Nzambi ulomba bwa mukaji kwenzaye. Kadi numona mu lumwenu lwa Nzambi, kî mmu lumwenu lwa ekeleeziya wenu to, mu lumwenu lwa Nzambi; kumona ní udi mufwanyine kwikala ne ngiikadilu udi ukengediibwa, mu webe nsòmbelu, bu Mukaji-musela wa nyuma wa Yesu Kilisto.

226 Bambi, elaayi meeji amweamwe awu. Udi ukosolwela mu tujila twa bikoso *apa*, bwa kulaminyina njiya ya muntu kampanda kuntu kwaka anyi? Udiku mufwanyine kwenza *cikampanda* bu cyôci kaciya. . . ne nebakwipate mu ekeleeziya anyi? Piikalabi ne mushindu awu ngwûdî udyumvwa, mwaneetu wanyi munanga, lekela nkudimwijeku, mu Dîna dya Yesu Kilisto, nyeema cyôci aci anu patudi twakulangana apa.

227 Ne wêwè peebe, inâbânzâ, pawikala kuyi mwa kukumbanangana ne ngiikadilu udi ukengediibwa bwa mwena Kilisto, kabiyi bya ne udi mwena Kilisto wa ku dîna to, kadi mu mwoyi webe, piikala nsòmbelu webe mukumbanangane menemene mushindu udi mukanda wa dibaka wa Nzambi wamba apa ne ki mudibi bikengela kwikala. . .

228 Ne wêwè, cidimba cya ekeleeziya, ekeleeziya wenu yêyè kayi nanku to, kayi mwa kukumbanangana ne ngiikadilu mulombiibwe wa Nzambi bwa Dîyi Dyende, patukamu ubwele mu Kilisto.

229 Aci ndidimwija dya kadiyi tuseku to. Twêtù katwena bamanye ne ndîbâ kaayi, ne wêwè kwêna mumanye ne ndîbâ kaayi to, diikalâ cimenga eci cikaadi cisanganyibwa mwinshi mwa mbû ewu.

²³⁰ “Kaa, Kaapenuma,” mwakamba Yesu, “wêwè udi mudibândishe too ne mu dyulu ewu, neupwekeshiibwe too ne mu iferno. Bwalu, bu byenzedi bya bukole ebi byenjiibwe mu Sodoma ne Gomola, nunku mbashaale biimane too ne leelu ewu.” Kadi Sodoma, Gomola badi basanganyibwa mwinshi mwa Mbû Mufwe. Ne Kaapenuma ukaadi mwinshi mwa mbû.

²³¹ Wêwè, cimenga cidì cilàka mukana cyamba mudici cimenga cya Banjelo, wêwè udi mudibândishe too ne mu dyulu ewu, ne mutuminangane bukooya bwônsò, bintu bikooyike bya mishindu ya mwadilu ne bikwabo, mu mushindu wa ne matunga meenyi miine akaadi alwa muneemu bwa kwangata bukooya bwetu twêtù abu bwa kwikala kubutuminangana, kutumina ekeleeziya yenu ya milenga ne ya tuleyi ayi, ne bikwabo, mushindu unudi nwênù nwenza amu. Wavuluka ne, dîngà dituku neusanganyibwe ukaadi mwinshi mwa mbû, nsapu webe munene wa bwîci awu mwinshi mwebe mpindyewu mene. Cijji cikole cya Nzambi ncyaci munkaci mwa kubyola anu mwinshi mwebe mene amu. Yêyè nealame cyâta cya lusenga eci cilèlemija kumutu kwa mbû too ne ku dibà kaayi? Padibi ne, mbû wawa, ne ndondo wa kilomeeta mujima ne citùpà, necisenunuke cidylèmu, too ne ku Mbû wa Salton. Neciikale cibi kupita dituku dya ndekeelu dya Pompéi. Nyingalala, wêwè Los Angeles.

²³² Nyingalalaayi, nwênù bakwabo, ne kudimukilaayi kudi Nzambi. Dibà dya cijji Cyende cikole dikaadi pa buloba. Nyeemaayi pacidiku dibà dya kunyeema apa, ne bwelaayi mu Kilisto.

Tusambilaayi.

²³³ Nzambi munanga, padibi ne, mu nyuma wanyi, ùdi ùzakala, mwoyi wanyi udi umacisha mamata a binsonji bya didimwija. Enzaku, Éyi Nzambi, bwa balume ne bakaji kabeediku meeji ne bîngâmbì ebi mbilele ngeela to, ne beena ekeleeziya kabeediku meeji ne civwa ncintu kampanda ciikale cipumbishi anyi cya kubalwisha naaci to. Swaku bwa bamone, Mukalenge, ne mmu dinanga.

²³⁴ Wêwè udi umfidila bujaadiki, Nzambi wa Bukole bwônsò, bwa ne ndi muye ku mwelelu wa mbû eku mbânda mpweka, ku cidimu ne ku cidimu, ngenda ngamba Dîyi Dyebe. Mfidilèku bujaadiki, Éyi Nzambi wa yaaya, bwa ne bu cyôci aci mwa kwenzeka diloolo edi, ndi mwambe Bulelela. Wêwè's udi mumanye ne cikeena-kumona cya Mukaji-musela eci m'Bulelela. Ndi mwangate Dîna Dyebe pamwe naaci, Mukalenge, ne mwambe ne civwa ng'EMU MMUDI MUKALENGE WAMBA. Ne ndi ndyumvwa ne ndi mumanye, Mukalenge, bîndi genza.

²³⁵ Pa nanku nyewu nKulomba, Mukalenge, mu Dîna dya Yesu ne, enzaku bwa bantu badinyukulule, diloolo edi, ne banyeeme cijji cikole cilwalwà aci, bwalu Ikâbodâ nyewu

mufunda kumutu kwa biibi ne kuulu kwa matunga. Cimanyinu cifiike cya dikenketa ncyeci cyākòsololu ditunga. Nyuma wa Nzambi wabungamijiibu kùdìdì, ne bábàpimi mu bipiminu ne bábàpecì kabayi bujitu. Difesto dya Mfumu Nebukandeneesa ndyedi dyènzèkì cyakabidi, dya bantu bakwacike maala ne bakaji bavwale bu badi kabayi bavwale, badibiikila mudibo beena Kilisto.

²³⁶ Éyì Nzambi wa mu Dyulu, leejaku luse pa buloba bwa mpekaatu ne cisamba cya mpekaatu, Mukalenge, bu mutudi twètù aba diloolo edi. Nzambi, nyewu nteeta bwa kwimana pankaci mwikale ndomba luse lwa Nzambi, bwa Wèwè wakule mu musùmbà ewu diloolo edi ne wambile Mukaji–musela Webe bwa abawule maci, Mukalenge, bwa kwikala kwenda kakuyi ku cimanyinu cya twitabaayi kampanda nansha, kadi ku dìyì dya Evanjeeliyo wa Mukalenge Yesu Kilisto. Enzaku nanku’s, Éyì Nzambi. Bimanyikeku, diloolo edi ne, Wèwè udi Nzambi, ne Dìyì Dyebe didi Bulelela. Patùdì twètù, kakuyi tuseku to, kumpala kwa bantu aba apa, tudi tubambila bwa kubawulabo maci ku Dìyì Dyebe.

²³⁷ Mu Dìnà dya Yesu Kilisto, ndi mbalombela, Mukalenge. Bààkaadi baKumonu Wèwè, kakuyi mpatà nansha ya kànà to, mwikale utwa eku ne eku mu misùmbà yabo ne ubambila bidi munda mwa myoyi yabo. Ne Wèwè udi mumanye, Mukalenge, ne, anu patudi twakulangana apa, cidi cyènzèkà ncinganyi. Wèwè udi mumanye ne m’Bulelela, Éyì Nzambi. Nenku ndi nKulomba, mu Dìnà dya Yesu, Nyuma Mwìmpè atulombeleku cyakabidi, Mukalenge, ne akeke apatule mu bateeleji emu, Mukalenge, aba badi bafundiibwe mu Mukanda wa Mwoyi wa Mwànà wa mukooko. Enzaku nanku, Éyì Nzambi. Ndi ndomba ne mwoyi wanyi wònsò.

²³⁸ Bantu aba, mu mubidi emu, Mukalenge, mbafwanyine kumpa too ne dikuta dyabo dya ndekeelu didibo naadi, bwa kutwa Mukenji nyama ku mikolo. Mbafwanyine kwenza cintu kana cyònsò cidibo bafwanyine kwenza aci. Kadi, Éyì Nzambi, pakaadibi ne ki kukumbanangana naaWu eku, ne kubwelaMu, ndi ndomba, Nzambi, bwa diloolo edi diikaleku diWikala mwa kubafuta ne kwicikija Nyuma Mwìmpè Webe pa cibilu eci. Kabidi swaku bwa kakwikadiku dinaya dya kèba–mùsà anyi dya tùmptùmpti to, kadi myadi ne mbila, ne kanyinganyinga, biikale kacya baakwata ku nsengu ya cyoshelu, patudi tumona manyooka akungula mwinshi mwetu apa, diloolo edi. Enzaku nanku, Nzambi. Ndi ndomba ne meeji anyi matooke ònsò mùndi paanyi mumanye, mu Dìnà dya Yesu Kilisto.

²³⁹ Mwaneeu wa balume, mwaneeu wa bakaji, ncyèna–ncyèna mumanye ne ncinyi cikwabo cidi cikengela kwamba to, piikalabi ne ndi mupeteku ngàsà ku mèsù kwenu, ku bukole bwa Nzambi, piikalabi ne nudi nwitabuuja ne mèmè ndi muprofeta Wende. Ewu musangu ngwa kumpala wúnkaadiku mwambe

aci bantu bitwilangane. Kadi ndi ngumvwa didimwija dya pabwadi dya mushindu kampanda. Ncitu ne meeji matuma ku cyôcì eci to. Nudi bamanye ne ncyêna naawu to. Ncitu ngenza maalu mu mushindu ewu to. Mvwa mwanji kwelakana bwa kwamba anu mwine Mukenji awu ne kwamba bintu abi. Mvwa ngenda nyeemena ku nseke ne bikwabo byônsò, bwa ne ncilu kucyenza to. Kadi nCyaci cyamanyi kwambiibwa, ne neCiimane mu Dituku dya Cilumbulwidi, bu bujaadiki bwa ne ndi mwambe Bulelela. Cidi ng'EMU MMÜDÌ MUKALENGE WÀMBA! . . . ? . . .

²⁴⁰ Kaa, Mpenta, nyeema bwa kusungila mwoyi webe. Nyeemena ku nsengu ya cyoshelu ne ela mbila, kumpala kwa dîbà kwikaladi dikaadi dimane kupita, bwalu dîbà nedilwe diwikala mwa kwela mbila kadi kabiciyiku ne dikwacisha to. Bwalu Esawu wakakeba bwa kupeta mwaba, bwa bwanaabute bwende, kadi kaciyiku mwa kubupeta to. Nyawu nkulambula, kaa, Californie. Kaa, cibilu cya beena Kantu-ku-Byanza baa Evanjeeliyo mu Kaabujima, bândi munange, nwênù bâmvwà mupatukile ne mulwe kuswikakana naabo kalamandindi, ne mwoyi wanyi wônsò, ndi nnulambula kudi Yesu Kilisto, diloolo edi. Nyeemenaayi kudiYe! Kanulekediku dyabulu unuvwija bakwate mashika bwa Eci to. Shaalaayi anu naaCi too ne panwikala, muntu ne muntu, buujiibwe tente ne Nyuma Mwîmpè, mu mushindu wa ne, aci cyanufikisha ku Dîyì edi, aci cyanulongololaku nwênù bakaji, aci cyanulongololaku nwênù balume. Pawikala wamba ne udi ne Nyuma Mwîmpè, kadi kuyi muswe kukumbanangana ne Dîyì to, awu nnyuma mukwabo munda mwebe. Nyuma wa Nzambi utu pa Dîyì Dyende, dya Maasiya, Dîyì dilaaba. Mukaji-musela udi ne cya kwikala Maasiya wa kânàkânà, Dîyì dilaaba.

²⁴¹ Tujukilaayi kuulu, mu Dîna dya Mukalenge Yesu Kilisto. Bu nwênù kanuciyiku kabidi mwa kuumvwa dîyì dyanyi. . . Kadi, bu Nzambi mwa kwanyisha, nyaaya ku Afrike, mu mēbà makese aa. Bidi mwa kwenzeka ne nciyiku mwa kwalukila to. Ncyêna mumanye to. Kadi nyawu nnwambila, ne mwoyi wanyi wônsò ne, ngânwâmbidi Bulelela. Ncyêna mudikande bwa kunujikwila maalu ônsò adi Nzambi mungambile bwa kwamba to. Ne ndi muCyâmbè mu Dîna dya Mukalenge.

²⁴² Edi ndîbà dya kadiyi dya tuseku to. Ndi mupange ne mwa kubyamba. Ndi muteete mwa kuumuka ku cyambilu misangu yisatu anyi yinaayi, kadi nciyi mwa kuumuka to. Edi ndîbà dya kadiyi dya tuseku to. Kanudipuku mwoyi to. Eci cikondo, pâmwâpa, ncidi Nzambi mwa kwikala wenza dibiikila Dyende dya ndekeelu. Ncyêna mumanye to. Yêyè neenzè dibiikila Dyende dya ndekeelu, dîngà dituku. Dîbà kaayi? Ncyêna mumanye to. Kadi ndi nnwambila ne, bilondeshile cikeena-kumona aci, bidi anu bu ne Mukaji musela awu ukaadi wamba kujika.

²⁴³ Tangilaayi numone mukaadi ekeleeziya ya ku dîna yenda yibwela. Paakalwa virgo mukutakane awu bwa kupeta Maanyi, yêyè's wakapangila mwa kuÀpeta. Mukaji-musela wakabwela. Dyambwibwa dyakenzeka. "Pacivwabo baye kasumba Maanyi apu, Mubaki wakalwa."

²⁴⁴ Nudi balaale anyi? Tabulukaayi, lukasa, nwalukile mu nwênù. Nenku tusambilaayi, muntu ne muntu, byenze be ne tudi tupunga ne lufu mu kasunsa aka, mu Dîna dya Mukalenge. Tusambilaayi, muntu ne muntu, mu wende mushindu wa sungasunga.

²⁴⁵ Nzambi wa Bukole bwônsò, ikalaku ne luse kutudi. Mukalenge, ikalaku ne luse kûndi. Ikalaku ne luse kutudi twêtù bônsò. Bidi ne dikwacisha kaayi, nansha twêtù twenza cinyi, patudi tupangila mu maalu aa? Nyewu ngiimana ndomba luse, Èyi Nzambi, kumpala kwa cimenga cinene eci kutùkinaci mwinshi mwa mbû ne manyooka a Nzambi kudikumawu eku ne eku kwa mubangubangu ewu. Ndi ndomba, Nzambi, bwa Wêwè kubiikila Mukaji musela Webe. Nyewu mbalambula kûdi Wêwè mpindyewu, mu Dîna dya Yesu Kilisto. Amen.



DISUNGULA DYÀ MUKÀJÌ WÀ KUSÈLA LUA65-0429E
(The Choosing Of A Bride)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinâyì diloolo, mu matuku 29 a ngondo mwinâyì, cidimu cya 1965, bwa Cibilu cya Buloba bujima cya Bwobumwe bwa beena Kantu-ku-Byanza baa Evanjeeliyo mu Kaabujima ku Cilaala-beenyi cya Biltmore mu Los Angeles, Californie, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maaluu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org